

弘

簡

錄

弘簡錄卷一百五十八

庶官 宋六之三

翟守素

田仁朗

陳承

劉綜

安守忠

孔守正

譚延美

趙延進

輔超

王杲

張思均

周審玉

薛超

丁罕

趙

王永美

李繼周

子士彬

李重壽

常思德

楊允恭

兄允升

秦義

郭載

符居潤

張美

王贊

趙北

李洧

張質

燦崇吉

翟守素任城人父溥晉左司禦率府率守素以任爲殿直歷漢

周遷供奉官領承天軍使乾德中爲引進副使王師伐蜀命往

來馳告軍事擢判四方館又以餘寇未殄再入蜀經略分兵防

過開寶中麟府內屬戎人爭地不決因致擾亂命守素馳往撫諭辨其曲直卒以悅服從征太原監海州刺史孫方進軍圍汾州轉引進使歷劔南十州都巡檢東上閣門使賜錢五百萬入謝辭不敢當上不許更遣爲岐帥符彥卿官告使吳越來朝命護諸司供帳迎勞郊外并壘未下詔與郭進率兵深入其境蹈藉禾稼多所鹵獲太宗遷客皆使領憲州刺史河決滎陽領護鄆州丁夫千五百卒千人塞之梅山洞蠻恃險叛命守素率諸州屯兵往擊值霖雨弓弩解弛明日將接戰夜令軍士別稍木爲弩及旦賊奄至勁弩交射賊大敗乘勝逐北盡平其巢穴錢俶獻地詔爲兩浙兵馬都監安撫諸郡人心甚悅卽以知杭州歲滿轉西京巡檢權知河南兼留守司事屬歲旱艱食多盜守素至漸以寧息雍熙二年改知延州領商州團練使自君子館

之敗河朔諸州城壘多圯詔與田仁朗王繼恩郭廷潛分路按
行發諸州鎮兵增築功完賜白金留充天雄軍兵馬鈐轄知大
名改潞州會建方田又爲代北方田都部署并州兵馬鈐轄屯
夏州改知鳳翔淳化中李繼遷不靖詔復屯夏州尋徙石州以
老病求歸本郡卒年七十一守素性謹慎寬仁容衆所至有聲
績凡斷大辟雖罪明白仍徧詢僚衆同而後決之屬吏有過
不面折援往事相類者微致其警逮事四朝歷內職五十餘年
後進多至節帥守素獨久次不遷殊無介意時論以此多之

田仁朗大名元城人父武仕晉昭義軍節度使仁朗以蔭爲西
頭供奉官宋初征李重進攻城有功討蜀命爲鳳州路環砦都
監伐木除道大軍以濟錄功遷內染院副使征太原陳承昭獻
計壅汾水灌城命督之將陷會班師俄遷院使改左藏庫使爲

中官所譏上怒立召詰問至殿門命去冠帶仁朗神色不撓從容謝曰臣遠破蜀秋毫無犯受知陛下今主藏禁中反忍爲姦利以自汗耶上爲霽威止停其職開寶六年起爲樞易使明年西北侵邊遂知慶州仁朗率麾下往擊短兵將接前鋒稍却立斬指揮使二人軍中震恐爭効命遂大受之其酋長相率請和仁朗烹牛置酒與之約誓邊境乃寧顯書褒美太平興國初秦州羗爲寇命屯兵清水會李飛雄事敗召爲西上閫門使再征太原命與閫門劉緒按行四面壕砦閱視梯衝器械太原平留爲兵馬鈐轄與武再興賈湜並爲巡檢役民築榆次新城改滄州鈐轄遷東上閫門使知秦州九年判四方館事會討李繼遷命召銀綬夏兵皆留防城不遣所部祇千餘人繼遷復攻麟州誘殺曹光實遂圍三族砦命與李繼隆王侁等馳傳發邊兵數

千擊之仁朗次綏州轉輸芻粟未備三族砮與綏相去道遠仁朗疏奏繼遷得部落情願降優詔外示懷來內啗諸酋長以厚利令密圖之不爾大爲邊患恐他日難制兼請益兵留月餘俟報無何三族砮將折遇弋殺監軍與繼遷合太宗聞之大怒亟遣劉文裕自三交乘急傳代仁朗令赴闕下按問御史推原仁朗定計欲伺繼遷攻撫寧砮力稍困以大兵臨之分強弩邀其歸路必成擒矣乃爲王侁等所搆上聞貸死責授商州團練副使後數月召拜右神武大將軍部修河北東路諸州城池數月而就留知雄州領涇州刺史時河北用兵節度使與通判權位不倫朝議選刺史有吏幹者佐之除定州節度副使卒于鎮年六十性沉厚有謀略頗涉書傳所至有善政雅好音律尤臻其妙內職中以爲稱首死之日人多惜之

陳承昭江表人事南

唐爲保義軍節度使世宗征淮南任濠泗楚海水陸都應援使
會拔泗州周兵東下時宋祖率甲士數千爲先鋒遇承昭于淮
上擊敗之追至山陽北親擒以獻世宗釋之授右監門衛上將
軍賜錦袍銀帶俄改右領軍衛分司西京宋初入朝太祖以其
習知水利命與田仁朗浚治惠民五丈二河以通漕運都人利
之河成賜錢三十萬其壻王仁表尚在南唐帝爲致書李景令
遣歸闕歷左右神武統軍建隆四年春復董近甸丁壯數萬修
畿內河堤又督諸軍數千鑿池於朱明門外以習水戰乾德五
年遷右龍武軍統軍卒年七十四贈太子太師錄孫宗義爲三
班借職

劉綜字居正河中虞鄉人少習詞業依外兄董遵誨嘗遣貢馬
太祖嘉其敏辨將授三班職自陳願應科舉登進士解褐中州

軍事推官收永康軍判官遷大理評事通判眉州轉太僕丞代
還言蜀地富庶安寧已久望慎擇益州長吏言切于理改授太
子中允未幾李順亂復召見賜緋魚尋爲三門發運司水陸轉
運使通判大名運丁家難起知建安軍以天長六合民輸賦非
便請降天長軍爲縣隸揚州以六合隸建安軍自是民力均濟
發運使王嗣宗規畫多滯請復置都大發運司專幹其職至道
二年遷太常丞職事修舉咸平初判三司理欠憑由出爲河北
運副言州縣募職其間有識廉謹之士或幼累無托或居止無
定全藉祿廩以濟朝夕一旦停罷使饑寒無依大傷和氣又法
官斷獄皆引律定罪及至奏御復云慮未得中別取進止殊非
一成不變之道望自今降旨約束又言河北承兵寇之後民戶
凋弊所餘官皆四方之人不習風俗有懷土之思以是政事多

因循不舉自今並乞以河朔人充之冀其安居勤於職事夏人
擾邊環慶大屯士馬徙綜陝西運副轉太常博士充轉運使條
上解鹽官器非便棄靈州中賊姦計獻議於鎮戎軍置屯田務
錄唐安國鎮制置城壕古記石木以進詔從其請賜金紫并緡
錢五十萬五年拜工部員外郎兼侍御史知雜事言天下州郡
長吏審官惟據資例未爲得人自今西川荆湖江浙福建廣南
地居津要戶口繁庶之處望親加選任其執政舊臣及給舍以
上知州處亦擇官通判又京朝官當遠任者率以父母未葬爲
辭意求規免請自今審官投狀明言父母已未葬方許依例考
課違者罷遣從之六年遷起居舍人再爲河北運使時兩河用
兵邊事煩急轉漕之任尤所倚辦綜繼領其職號爲詳練警急
之際輒資其奏處景德三年契丹請和遣近臣諭綜將擢用拜

戶部員外郎樞密直學士兼勾當三班院上言御史員數至少每奉朝請劾制獄多以他官承之甚紊弊制望詔兩制以上各舉才堪者充三院共置御史十員四年西幸道出河陽境上命綜權知孟州事徙并州以政績聞州民乞留優詔嘉獎歸朝知審官院改吏禮二部郎中兼知通進銀臺司祥符四年館伴契丹使命同知貢舉尋權知開封建議富民交結貴要爲之請託奏授試秩謁見官司頗紊公政其文武官遠任家寓京師子孫帝姬無賴者俱望嚴行約束詔可七年有疾命知廬州明年罷學士授右諫議大夫卒年六十一縉強敏有吏材所至抑挫豪右振舉文法時稱幹治然尚氣好勝不爲物論所許子建中正中兼贊善大夫弟綽進士官刑部郎中

安守忠守信臣晉陽人父審琦周平盧節度使封陳王自領山

南東道時署守忠牙內指揮使俄領緄衛二州刺史顯德四年
改鞍轡庫使初下淮南命守忠馳往宣諭抗以正禮無所辱命
朱祖居潛雅相厚善卽位超授左衛將軍守忠自處益謙從征
太原多與謀略人罕知之建隆四年湖南平命爲永州刺史乾
德中護河陰屯兵蜀平太祖憫遠俗苦苛虐特命守忠知興元
府以撫綏之尋改漢州刺史朝使勞午公帑不足至出私錢給
用太祖每戒使者言守忠在蜀能律己以正汝行見之當效其
爲人開寶初改刺濮州命副曹翰塞澶州決河護其役五年知
遼州獲部民陰召并人謀內應者斬以徇太平興國初移知靈
州雍熙二年又改易州徙夏州每西戎犯邊戰無不捷錄功就
拜濮州團練使端拱中知滄瀛二州兼高陽關駐泊部署瀛州
防禦使淳化二年徙雄州加耀州觀察使條陳邊事稱旨賜錢

五百萬。威德軍節度留後徙宋州兼制置營田使在任威德兼善吏民不忍其去咸平三年入覲遣還卒年六十九贈太尉錄其子繼昌供備庫副使圻王世及光祿寺丞生不謹愨淡薄治以簡靜樂施予豐宴犒且喜從士大夫遊時論多之以父因愛妓爲隸人所戕故終身不畜嬖妾而喜佞佛

孔守正河南浚儀人幼事後唐許王從益入漢爲東西班承旨事魏王承訓世宗以材勇選爲東班承旨宋初補內殿直兼領驍雄吐渾指揮從劉廷翰平蜀還驍雄副指揮使征太原隸何徽筠大敗契丹援兵於石嶺關斬首萬級獲其將王破得時宋師數百亦陷守正以騎軍馳之盡奪而還太平興國中累遷日騎東西班指揮使征晉陽分主城西洞屋領步卒大呼先登繼與內侍蔡守恩等率騎兵力戰晉軍遂潰從征范陽至金臺驛

詔守正與劉仁蘊先趨岐溝關夜趨垣度鹿角臨機橋說軍使劉禹降之禹解懸橋遂入城撫諭軍民屬綦廷明城守而已赴行在時契丹兵在涿州東復與傅潛率御前東西班分兩陣馳擊之逐北二十餘里降其羽林兵數百繼與高懷德劉廷翰合兵追至桑乾河契丹自是不敢近塞以勞再遷日騎都指揮使領瀋州刺史端拱初改龍衛領長州團練使出鎮真定上以其練習戎旅特置龍衛神衛四廂都指揮使以授之歷殿前都虞候定州行營副部署受詔詣保州軍開道遇敵于曹河與戰數合梟首三十餘獲馬五十匹上聞而壯之淳化初擢高陽關都部署明年護浚惠民河命知澶州就塞決河改慎州觀察使還領代州部署遷移并代夏綏麟府三鎮與李繼遷戰大橫岡授范廷名出塞破賊于白池至行莊焚掠甚衆真宗徙代夏二州

部署咸平初授昌化軍觀察留後上言四任鴈門邊亭久安願徙東北以自效會夏人入寇改定州副都部署四年移彰德軍留後以風疾改安化軍卒年六十六贈泰寧軍節度使

譚延美大名朝城人軀幹壯偉少不逞往來澶魏間爲盜世宗募置帳下補殿前散都頭從征淮南以勞遷控鶴副指揮又從克三關時宋祖領禁兵留督牙隊建隆元年進指揮使稍遷都虞侯馬步副都軍頭征湖南領行營戰權大敗朗州汪端擒之以還擢鐵騎副指揮使領睦州刺史四遷至內殿直都知太平興國初爲浙州刺史連徙廬壽濠光四州巡捕使捕獲劇賊六年徙知威武軍爲幽州西面行營都監與田重進出飛狐北遇敵出其不意麾騎軍直進遂敗之斬首五百獲其將大鵬翼以獻擢亳州防禦使逾年爲鎮州鈐轄端拱元年徙知寧遠軍契

丹兵抵城下延美令大開城門芻牧不禁契丹圍之數日疑爲
設謀引去進邕州觀察使判亳州兼知代州徙潞陝涇三州以
左領軍衛上將軍致仕卒年八十三贈建武軍節度使子繼倫
崇儀副使雍虞部員外郎

趙延進涇州頓丘人父暉周太子太師漢末領鳳翔節度未赴
鎮王景崇據其城卽命爲招討使延進年十八屢當軍鋒景崇
平秦捷授牙內指揮使領貴州刺史世宗授右千牛衛將軍宋
初改右羽林衛將軍濠州都監會伐蜀以襄州當州路津要命
爲鈐轄同知州務事峻專領郡事漢江水歲害民田延進令累
石爲岸水患遂絕充兩浙漳泉閩信使授右龍武衛將軍知靈
州以母老辭留淮荆右金吾街仗歷知河中府梓相青三州從
征并州討幽薊皆爲八作壕砦使期以半月造礮具八百凡八

日而成太宗親試大悅命主城北諸洞子及班師與孟玄喆藥
可瓊留屯定州遼人擾邊與崔翰李繼隆將兵八萬禦之賜以
陣圖分爲八隊各去百步師次蒲城乘高望見遼騎至東西
互野不見其際翰等方授圖布陣延進與繼隆前語諸將曰主
上委吾等以邊事期於克敵今敵衆若此而我師星布勢相懸
絕彼若持我將何以濟不如合而擊之可以決勝與其從令而
辱國孰若違令而獲利乎翰等懼曰萬一不捷將若之何延進
曰事有變適安可預定也獲違詔之罪請獨當之乃改爲二陣
前後相副士衆皆喜也大破之獲人馬牛羊鎧甲數十萬以
功遷右監門衛大將軍知鎮州代日吏民數千守闕借留詔許
一年俄改右領軍衛大將軍高陽關平戎軍都監兼緣邊巡檢
改鈐轄知揚州又改右屯衛驍衛二大將軍進知相鄧二州飛

蝗不入境詔褒之選判右金吾街仗本衛大將軍咸平二年卒
年七十三贈左武衛上將軍延進姿狀秀整涉獵經史好作詩
士流多之妻尹氏卽淑德皇后妹兩朝頗任以腹心子昂登太
平興國進士至戶部郎中直昭文館

輔超忻州秀容人少勇悍有力家世業農晉開運中應募隸澶
州軍籍漢乾祐中從周祖討趙思綰攻永興城以功補小校顯
德中轉日騎副兵馬使宋初從平上黨再遷內直都知太宗選
爲馬軍都頭征太原冒矢石礮堞先登身被十三創上嘉其勇
悍賜錦袍銀帶帛五十段詰朝再乘城中流矢入復加厚賜襲
范陽隸偏將米信爲田重進先鋒取飛狐蔚州遷馬步軍副都
軍頭補曹州馬步軍都指揮使領峯州刺史改藥州名還淳化
三年出刺德州坐誣奏使者殺驛吏責投右監門衛將軍連

領誠澄二州刺史真宗真拜萊州團練使以老願留京師卒年七十七

王果齊州人周顯德中應募從世宗收三關隸先鋒宋初從征澤潞平揚州遂散指揮使轉馬軍副都軍頭屯并州雍熙中爲龍衛右第二軍都虞候命引兵護送趙保忠還虜方物拒不納太宗知之賜白金遷右第一軍屯鎮州隸大將郭守文扞契丹城守北關寇退督餉越威武軍遇賊于徐河按兵拒之殺賊奪所乘馬守文上聞得召見問狀補都軍頭領勤州刺史命監河北軍有能聲尋命閻教定州諸軍騎射入掌軍頭引見司討李願爲西川招安使有功真拜唐州刺史賊黨尚保山林復追捕於彭州至道初遷靈州副部署知并與夏州趙保吉歸欵名還移石州兼石隰副部署未幾轉餉河西失期降右千牛衛大將

軍咸平五年出爲亳州永成縣都監以疾卒年六十四

張思均邢州沙河人漢澤州刺史中正之孫少能擊劔挽強善博奕應募爲卒晉開運間遷廣銳軍使廣順初從聶知遇攻河東破其衆向訓東征爲捉生將擒小校張萬于江猪嶺又從符彥卿與并人鬪代州留爲南北兩關巡檢宋初補龍衛指揮使從李繼勳下遼州戰帶甲祠追奔至長城擒其將莫山鮑淑掠人騎二百屯潞州合戰三十以勞遷都虞候開寶三年從郭進田欽祚戍三交戰於石嶺關祇候齊延琛苗杲陷軍中思均鼓勁騎突入奪還又隸何繼筠麾下入晉境拔南橋徑度太平興國初屯定州領兵授磁壑敗其衆身中創不顧逐賊薄城奪馬及鎧甲居多未幾邊人復來攻逆戰城下上嘉之命賜袍帶領河州刺史劉廷讓敗陷留敵中數年端拱初始逃歸授澄州

刺史知齊州思均本以武進不知民政徙濮鄆濱棣四州巡檢使改鄆延會葺石堡砦擊寇走之寇又逼保安軍與曹瑋往援追躡五十餘里至木場遁去真宗徙益州鈐轄兼綿漢九州都巡檢使討王均出兵保綿州進克漢州斬僞刺史苗進又與石普敗賊彌牟砦恃其功多求巴西尉傅翽善馬不與責以轉餉後期斬之事聞召赴臺鞫特貸死削籍流封州六年起爲左司禦率府率監考城軍上幸涇淵召思均與李繼隆石侁吉同議兵事賜服御景德二年爲西京水北都巡檢使分司西京上憫其老授唐州防禦副使徙鄭州再遷左千牛衛將軍卒年八十九子承恩三班奉職思均自起行伍征討有功短小而精悍軍中稱爲婁雞

周審玉開封人父勲以親校事唐明宗累立戰功至隰州圍隸

使周顯德初審玉蔭補殿直從世宗平瓦橋關甚見親信入宋
為供奉官閤門祇候累遷崇儀洛苑副使西京作坊使雍熙中
監潘美軍屯定州嘗與敵戰先鋒劉緒陷賊審玉躍馬趣擊拔
緒而還以勇敢聞淳化中知貝州有虞候趙威雍父鱗晉天福
甲誘契丹屠州城至是五十年遇驍捷卒三十七人同謀推威
雍為首劫庫兵以叛審玉覺之與轉運王嗣宗悉擒斬之磔威
雍於市故老傳以為異以功領順州刺史徙并州鈐轄咸平初
知鳳翔有桑門乘傳而西以市木為名威勳府縣審玉按詰之
得其姦狀杖背送闕下以目疾代還奉朝請久之丁內艱上章
請老以千牛衛大將軍致仕真宗嘗召至便坐示以攻戰圖方
奏對疾作輿使就第賜白金慰恤之自少雖長兵間習攻守晚
年好讀本草留意方術卒時年七十四子允迪虞部員外郎

薛超遼州平城人少有勇力乾德初應募爲虎捷卒從崔彥進
伐蜀鋒功補都虞候遷十將太平興國初四遷至天武指揮使
從征太原領遊騎千人備禦鎮定境上以張軍勢車駕還從大
將劉延翰率兵至徐河遇契丹兵挑戰超躍馬直前射斃數人
敵勢遂却大軍乘之奮斬萬餘級以功加步軍都頭神衛軍校
領叙州刺史又從潘美北征至馬門西復與契丹戰敗之追至
寰州斬首五百級遼將趙彥辛以城降超時進被數創流血濡
甲部分軍士自若乘勝抵應州降節度艾正遷加馬步都軍頭
淳化初屯鎮州遷天武指揮使領澄州團練使卒年五十七
丁罕潁州人應募補衛士遷指揮使戰徐河以奪橋功遷本軍
都虞候累遷天武指揮使領蕤州團練使淳化三年改澤州團
練知潁州會河溢壞城罕悉力完補有不繼佐以私財民咸德

之五年加容州觀察使領靈瓌路行營都部署與李繼遷戰斬首俘獲數萬至道中率兵從大將李繼隆出青岡峽賊聞先遁窮追十日卒于守德能世其家 趙瑫貝州清河人由衛士遷龍衛指揮使亦以徐河功加鎮州團練使至兵馬部署卒年七十贈歸義軍節度使

王承美豐州人本河西藏才族首領其父事契丹為左千牛衛將軍豐州刺史開寶二年率眾來歸授承美豐州牙內指揮使父卒改天德軍蕃漢都指揮使知州事給俸同蕃官例遣軍校詣關願誘退渾突厥內附上嘉其意太平興國七年與契丹戰斬獲萬計禽偽天德節度韋太以獻明年契丹入寇承美又擊敗其眾追北至青冢百餘里斬獲甚眾以功授本州團練使淳化二年冬來朝令歸所部控子河漢自是諸蕃歲脩貢禮頗效

忠順景德初來朝推其守邊歲久有勞遷本州防禦使月增俸錢五萬尋請於州城置孔子廟詔可未幾被疾遣中使挾醫診視祥符五年卒贈恩州觀察使子文玉襲任曉達軍政文恭供奉官文寶及孫懷筠皆為侍禁

李繼周延州金明人祖計都父孝順皆為金明鎮使繼周嗣掌本族入宋與李繼福同時歸順太平興國三年東山蕞落集衆寇清化砦率衆敗之殺三千餘人補殿前承旨雍熙中又與侯延廣敗末藏末廆等族于涇州西山淳化四年遷殿直賜介冑戎器茶綵明年討李繼遷命開治塞門鴉兒兩路迎擊繼遷兵於途却之招降首領二十餘族率所部入夏州收蕃兵數千於石堡砦以功轉供奉官復加恩賞仍賜官第命脩築阿都關盧關等砦有磨盧家媚咩拽藏等族居近盧關未嘗內順繼周夜

率所部往襲焚之斬獲甚衆至道二年授西京作坊副使賜袍帶銀綵彤戈以寵之大軍討西夏命爲延州路踏白先鋒咸平初改西京右藏庫副使三年復爲先鋒入賊境焚積聚殺人畜獲帶甲授供備庫使領金明縣兵馬都監兼新砦解家河盧關路都巡檢五年授西京作坊使蕃騎入鈔遂之出境景德元年夏人圍麟州詔率兵會繼福掩擊加領誠州刺史祥符二年卒年六十七子殿直士彬管勾部族事爲人遜慙邊人言從子士用練習邊事性朴忠爲部落所伏乃詔士用爲巡檢都監以佐之康定元年元昊潛兵襲金明士彬父子俱被禽繼福初授永平砦菱村軍主以戰功歷歸德將軍領順州刺史至內殿崇班新歸明諸族都巡檢

李重誨金城人祖高後唐莊宅使獎州刺史父彥榮仕契丹署

環州刺史潘美北伐以重誨爲應州馬步軍都指揮使從節度使蕭咄李迎戰于代州北嶺咄李被殺重誨受擒太宗召見改鄧州馬步軍都指揮使趙普出鎮奏監其軍雍熙三年遷領武州刺史充忻州都巡檢緣邊十八砦招安制置使賜服帶鞍馬以所部邀戰敗北兵獲牛馬鎧甲賜詔嘉美會嶺蠻叛改廣桂融宜柳州招安捉賊使聽便宜從事至道初累遷涇原儀渭鎮戎軍鈐轄咸平三年徙邠寧環慶路坐轉餉靈武至積石爲敵所掠除名流光州起爲內殿崇班鄜延駐泊都監遷崇義使景德中趙德明納款上以涇原地要兵衆慮有殺急徙爲鈐轄復遷益州改皇城使卒年六十八重誨純慤寡過真宗悼其沒于遠土命子禹謨乘傳往護錄爲將作主簿禹偁閤門祇候弟重睿歷官澄州團練使

常思德開封人初以材勇應募隸天武軍累遷神衛都虞候從曹彬征幽州署牙校拒馬河之敗彬左右皆潰散獨思德以所部護至易州語人曰旣備戒行則與主帥同死生可也若視利害以爲去就將何面目見君父乎端拱初以弓箭直都虞候領溪州刺史討李順命往夔陝招捕陞辭日太宗語以北征時事深加慰勞且諭之曰爲臣以忠實爲本汝少壯時能盡心主帥今雖老亦當無負乃職庶不辜朕之委寄也思德頓首謝師次達州新寧縣調近州土兵掩殺三千餘人大軍抵合州賊衆二萬來拒復與尹元裴莊等合擊之賊帥田奉正蘇榮先據果州至是遁因而追捕斬首八百二州旣定分兵爲二餘賊走廣安梁山者思德禦之趣渠州者元莊禦之合力進討盡殲其衆以功真授汝州刺史未幾移慶州路副都部署屯邠州咸平初與

李繼隆同部芻糧赴靈州以疾改陳留都監換左神武大將軍卒年六十五

楊允恭漢州綿竹人家世豪富兼有膽幹少側儻任俠遭王小波亂率鄉里子弟若干清泉鄉爲賊所得給之獲免以策于丁德裕署綿漢招收巡檢賊平補殿前承旨至殿直出掌廣州市舶因部運入奏自南漢後州縣歲苦海賊太宗卽命爲廣運都巡檢使時鹽自嶺入盜販者衆允恭請建大庾縣爲軍輦鹽官車以免其患詔建爲南安軍有葉姓賊衆五百餘往東海上允恭集水軍掩襲斬之餘黨棄船走劫男女伏匿山谷蔓抵漳泉復伐木開道奪還婦女六十餘口賊平詔書嘉獎賜錢十萬轉供奉官改內殿崇班命督江南水運兼捕寇盜行及臨江軍擢驍卒率輕舟夜伺其山沒獲賊百餘悉梟其首進趨通州海賊

列舟張幕反施弩破中允恭左肩流血及袖容色彌厲遣善泗者填賊舟以鐵鈎牽其幕士卒爭奮賊大半赴水死生擒數百以功轉洛苑副使江淮兩浙都大發運擘畫茶鹽捕賊事賜紫袍金帶錢五十萬先時上供米歲不過三百萬三路領職者多以舟楫不給率挽犍役至是盡籍三路舟卒與所運物數令諸州擇牙吏辨數授之如江浙所運止于淮泗復由淮泗轉輸京師一歲至者六百餘萬淳化五年轉西京作坊使時茶法屢更精纒不校商人弗肯售久至焚棄又兩河風土各有所宜非問以數品卽商人少利至道初請廢緣江榷務許商人過江貨鬻允恭請依舊江北置務以諸州新陳相揉均其色號以年次給之事下三司陳恕等議以爲是卽改擘畫爲制置命以爲使副者作坊副使李延遂著作郎王子興又巢與廬江舊隸廬州道

遠多寇民輸勞費尤恭奏建爲軍從之又言行法宜一淮南十
入州軍其九禁鹽餘請悉禁遣官吏主之三司言其不可允恭
再三請亦從之是歲收利巨萬真宗改西京左藏庫使言州峽
鐵錢之弊請運饒信銅以達荆峽運蜀銅以達夔益各置錢監
歲用均給不十年將徧用矣議雖未用然自是吏卒奉給多用
銅錢以易移知通利軍兼御河發運使會議減西鄆屯兵以息
轉餉命與副使竇神寶祇候李允則馳往經度圖上山川形勝
因建議自環州入積石抵靈武七日程若藉人驢轉運其費頗
煩况所載數少莫若用小車每四人挽之旁設兵衛寇至則合
士卒禦之爲議者所沮復遣之任加領康州刺史咸平初又令
平估北邊寶馬未有定直因置估馬司鑄印遂爲常制王均亂
改荆湖江浙都巡檢使以疾卒于昇州年五十六賻其家錢絹

命揚州造第賜之 兄允升弟允元屢爲王師鄉導併力被李
順兄自榮於綿竹執詣劔門王繼恩表其功詔賜允升學究出
身投右贊善大夫本縣令允元大理評事什邡令長子可咸平
元年進士除大理評事侍父疾召試歷戶部鹽鐵判官知洪宜
渭壽潭五州善屬文有吏幹終都官員外郎 次子告字道之
賜同學究出身調廬江尉累遷至司封員外郎開封推官判開
拆司爲趙元昊旌節官告使除京西運副屬歲饑發公廩募富
室出粟賑之有伐桑易粟者命高其估以給酒官民獲濟以疾
權管勾西京留臺出爲淮南轉運使歷官少府監拜右諫議大
夫知鄭州徙江寧壽州告曉法令不務苛刻時號爲能然喜事
權貴以要進一子力學有文近臣薦召試同進士出身未幾卒
告悲傷之亦卒

秦羲字致堯江寧人世事江左曾祖本岳州刺史祖進遠寧國
軍節度副使父承裕建州監軍使知州事歸朝遣羲詣闕上符
印太祖召見悅其趨對詳謹補殿直令督廣濟漕船太平興國
中南唐軍校馬光遠等亡命荆楚結徒爲盜羲縛以獻太宗壯
之積勞改西頭供奉官決獄淮南諸州淳化中督洛南採銅雷
有終稱其心計遣監典國軍茶務揚允恭又薦掌真州榷務尋
提點淮南西路茶鹽得羨餘十餘萬擢閤門祇候江淮制置茶
鹽榷稅歲增錢八十三萬真宗而加慰勞改內殿崇班兼制置
荆湖路江南羣盜久爲民患羲討捕皆盡領發運使改供備庫
副使歲增榷酷十八萬會歲旱以爲刻下詔罷之景德初知江
陵坐舉官不如狀削秩復起爲染院副使監宿州軍又爲供備
庫使充廣州鈐轄鎮撫澄海官兵移知蘇州改崇儀使提舉在

京諸司庫務遷內園使知泉州卒年六十四職知書好爲詩喜
賓客頗有士風屢以材幹斃財貨精勤練習號爲稱職

郭載字咸熙浚儀人父墀右監門衛將軍義州刺史載以蔭爲
右班殿直遷供奉官閤門祇候雍熙初提舉西川兵馬捕盜事
賜鞍馬器械銀錢以遺積勞加崇儀副使還言川峽俗多贅婿
死則與其子均分財產故貧者多詔禁之端拱二年擢引進副
使知天雄軍俄同勾當三班出知秦州兼沿邊都巡檢使先是
巡邊者多領兵騎以威戎人所至煩苦載悉減去戎人感悅遷
西上閤門使知成都行至梓州李順亂有日者潛告益州必陷
公往當受禍少留數日可免載怒曰吾受詔領方面今臨危迫
豈敢遷延卽日入城順兵攻城益急度不能守率僚屬斬關出
以餘衆趨劔門隨招安使王繼恩統兵討順平之復入城月餘

憂悸而卒年四十民以載前在蜀頗能爲民除害及再任卽值兵亂平賊後亦有所全濟多歎惜之

皆居潤博州高唐人素善書計爲後唐樞密院小吏以權恩攝晉初補牙職出掌滑州廩庾景延廣留守西洛署爲右職又依陝帥白文珂薦於周祖補世宗京府要職卽位擢軍器庫使征高平有功遷客省使知青州從向拱西征爲行營都監秦鳳平除知秦州歷鳳陽河中二府遷內客省使宜徽北院使知開封府事恭帝加檢校太傅與宋祖同事情好款洽受禪加大尉征澤潞命赴澶州巡警師還權知鎮州加左領軍衛上將軍建隆二年權知澶州拜義武軍節度使卒年五十九贈太師性明敏有節槩篤於行義晉室將亡延廣委其族自洛赴難爲遼人所執僚吏部曲悉遁居潤獨力保護家賴以安嘗薦沈倫純謹可

用後至宰相世稱其知人子監質內園使弟居濟水部員外郎
祥符三年錄其孫建中爲三班借職

張美字玄球貝州清河人少善習計與觀城人王贊俱爲小吏
粗知學問以幹敏聞三司薦奏特補美左藏庫專知出爲澶州
糧料使世宗鎮澶淵每有求取曲爲供給周祖怒徙美濮州馬
步軍贊澶州馬步軍皆都虞候世宗每旬決囚贊引律命辨折
中理卽署右職補東頭供奉官卽位召美爲樞密承旨右領軍
衛大將軍三司使贊爲右驍衛將軍三司副使上問京城衛兵
歲廩幾何美不能對贊代奏甚悉征淮南及北征皆留美爲大
內部署兼都點檢贊爲客省使領河北諸州計度使師還美轉
左監門衛上將軍宣徽北院使仍判三司靈力有心計周知利
府每有所釐革條奏多可之時連歲征討糧餽不乏深所倚賴

宋初加檢校太尉預度上黨李筠有異心陰積粟於懷孟間大軍十萬出太行經費無闕美有力焉拜定國軍節度使乾德五年移鎮滄州太平興國初來朝改左驍衛上將軍致仕卒年六十八諡恭惠子守瑛供備庫使孫士宗內殿承制士禹崇班士安閣門祇候士宣禮殿副使 贊所至發奸擿伏無所畏忌自五代以來姑息漸俱有司不敢繩以法及是振舉綱領號為稱職太祖素知贊材幹平李重進令知揚州行日舟覆溺死甚為嗟悼賻以絹麥各三百

趙玘澶州人家富於財晉天福中納粟助邊補集賢小吏調濮州司戶叅軍刺史白重進欲試以事因授滯獄使為平決悉能中理連辟號成二州從事秦成階三州觀察判官顯德初為郢州刺史歷汝密澤三州建隆中入為宗正卿乾德初復刺秦州

擢左監門衛大將軍判三司素性狂躁倖直多忤上旨太祖頗
優容之嘗廉得趙普私市秦隴大木潛以聞上然懼普知求解
職疏留中不出址不勝忿踰年伺普入朝馬前楊言其短上召
問面質因大言詆之上怒黜爲汝州牙校卒年五十八

李鴻河南人初爲三司小吏陰狡多智數時天下新定太宗屬
精政事嘗論及財賦欲有所更革引三司吏二十七人對便殿
問以職事鴻詢其目退而條上七十一事詔以四十四事卽日
行之餘二十七事下三司議可否復遣知雜張乘中使張崇貴
監議令中書專檢舉之無致廢格因語輔臣呂端曰朕嘗諭陳
恕金穀利害鴻等自幼至長寢處其中必能究知本末宜假以
辭色誘令開陳必有所益而恕等強復自用莫肯詢問因命悉
官之賜錢幣擢鴻左侍禁提點三司孔目官請若內外百官諸

軍俸祿爲定式加閤門祇候催運陝西糧草赴濟遠軍還提舉
在京倉草場勾當北作坊齊州大水壞民慮命欲徙州城未決
命溥往視果徙之還使陝西歲增酒榷緡錢二十五萬三遷崇
儀使景德中東南茶法弊命制置江淮等路茶鹽礬稅爲發運
副使與林特劉承珪更定歲入茶視舊頗增五百七十餘萬斤
募人人金帛京師入芻粟塞下數倍其直遷爲使歲運江淮米
輸京師增至六百萬諸路猶有餘蓄舊用使臣或大將人掌一
綱時多侵盜溥併三綱爲一以三人共主之使更相伺察祥符
九年失糧二百石漕舟東下還過泗州又令載石輸高郵新開
湖積爲長隄自是舟行無患累遷北作坊使會建玉清昭應宮
盡括東南巧匠詣京且多致奇木惟石以傳會帝意建安軍鑄
玉皇聖像又令爲都監領順州刺史獎州團練使遷宮苑使溥

本起更徒性貪鄙既久專利權寔爲不法薦蒙民于譙縣射陳
齊前論茶法任以京官又黨於丁謂人畏之無敢言者發運使
黃震條其罪狀發奸賊數十事罷知潭州貶忠武軍節度副使
仁宗起知淮陽軍歷光黃二州復以賊敗死

張質字守朴高唐人少孤養于兄玆爲樞密院典謫質因得隸
兵房爲趙普曹彬所知太宗征河東還駐鎮陽兵籍阻留在後
日夕有所調發質潛計兵數部分軍馬得籍較之悉無差謬累
遷本房副都承旨咸平初授左監門衛將軍樞密吏職繁多皆
以年勞次補有至主事而育於其職者景德三年內出公事三
條令主事以下詳決之質與禮房副承旨尹德潤宿御書院考
第翌日上親臨閱視凡經選補崇班供奉官奉職者十餘人不
中式四十餘人加質月俸後歷右屯衛右神武軍右衛三大將

軍祥符七年轉都承旨上知其廉謹特授是官在樞要凡五十年練習事程精敏端慤未嘗有過上嘗召問五代以降洎國初軍籍更易之制且命條具利害纂爲三篇目曰兵要以進上覽而稱善質好養生之術老而不衰多接隱人方士然語不及公事每大祀巡幸多領行宮巡檢提點供頓之務卒年七十四錄其子大理評事純衛尉寺丞孫思道三班奉職

樂崇吉字世昌封丘人少爲吏部令史上書言事調補臨淄主簿俄爲令復以書判優等留爲中書刑房改右贊善大夫出掌揚州權務未幾遷殿中丞兼提點五房公事明習文法清白勤事至道初擢度支員外郎轉副使加祠部郎中真宗罷江南轉運代還後遷司農少卿知洪州有司歲缺民財造舟崇吉奏罷之尋徙濠州以將作監致仕卒子二源虞部員外郎泝殿中丞

弘簡錄卷一百五十八

終

弘簡錄卷一百五十九

明刑部員外郎仁和弘齋邵經邦學

皇清翰林院侍講學士四世孫遠平校閱

庶官 宋六之四

王顯

子希遠

柴禹錫

道

張遜

楊守

王延德

又

程德玄

盧斌

張煦

陳從信

侯莫陳

張平

子從

王繼升

子昭遠

尹憲

王賓

安忠

戴興

王漢忠

張凝

李重貴

劉川

耿全斌

元達

王能

魏能

陳興

王榮

楊瑒

周瑩

傅潛

張昭

郭密

傅恩

李斌

王顯字德明開封人家世本儒遭亂失業初為殿前司小吏事
都點檢張承德太宗居藩與弭德超給事左右性謹介不好狎

未嘗足踐市肆太宗卽位遂有寵累補殿直遷軍器庫副使東
上閤門使忿曹彬任樞密使思代其位會上念邊戍勞苦月加
賜資謂之月頭錢德超以惡變聞于上曰臣從鎮州來聞士卒
言月頭錢彬恩所賜微彬幾餓死矣其得士心久將爲不利上
心疑之亟命出彬而除顯宣徽南院德超宜徽北院並兼樞密
副使未幾進顯樞密使賜以道德坊宅一區並軍戒二篇諭曰
旣典機務無暇博覽但能熟此亦可免於而墻同列趙昌言寇
準頗易之無何上知德超之譖復還曹彬顯爲隨州刺史充
崇信軍節度觀察留後除知永興軍徙延州上疏言夏臺益部
寇擾宜謹屯戍固城壘積芻糧選才勇付以邊任縱有緩急備
禦有素彼奚能爲我患哉時制沿邊糧斛不許過河西河西青
鹽不得過界顯請爲差別輕重遠近便之移知秦州盧知翰奏

先時蕃部獻地雖朝命給還而採伐如故請最細茶絲以酬其
且詔遣張從式同往規度顯言乃者因趙保吉脩貢邊城惟務
安靜今無故動衆誠爲非便議遂寢咸平初入朝授橫海軍節
度使移知鎮州曹彬卒復拜樞密使二年郊恩加檢校太師與
副使宋湜從真宗幸大名三年改山南東道同中書門下平章
事定州路行營都部署河北都轉運使兼知定州明年加鎮定
高陽關三路都部署許便宜從事契丹入寇前軍過威武北時
方積雨契丹弓弩濕緩因大破之梟名王貳將十五員獲孫林
印二鉏斬首二萬級手札慰諭改河陽三城節度使時議親征
顯上言盛寒在序敵未犯塞况今繼遷未滅西鄙不寧儻北邊
相與結援則中國之患未可量也若能選將練卒堅城繕甲亦
足待敵必欲復燕薊舊地則脩文德養勇銳伺時之利以奉行

天罰而後可景德初徙知天雄軍上親征復陳三策已而契丹
稱盟德明脩貢加以賞賚許迴青鹽皆其請也三年冬被病車
駕上陵恨不得一拜詔中使偕尚醫療視遂卒年七十六駕已
至郊間之遺宮苑使邵永遷馳還護喪贈中書令顯龍觀自固
頗縱部曲擾下時因攀附不數年遂正樞任獎擢之速時無比
者與永德同日宣制拜使相鎮孟津永德兼大夫友在其下舉
朝訝之 子希逸字仲莊幼好學聚書萬卷尤熟唐史以蔭補
供奉官換秩授朝奉大夫太子中允咸平初改殿中丞直史館
預脩冊府元龜加祠部員外郎希範至如京副使 德超滄州
清池人初補供奉官遷酒坊使歷杭州兵馬鎮州駐泊都監踰
時不遷恥居同官柴禹錫下怏怏不樂語多怨望云上無執守
為汝輩眩惑顯密以告上怒使滕中正就第鞠問伏辜詔奪官

職并家口配隸瓊州以死

柴禹錫字玄圭大名人自少質敏不凡留心問學以善應對給事晉邸太宗卽位授供奉官服勤職業改翰林副使遷如京使仍掌翰林司每夜直多召訪外事遷宜徽北院使與趙鼎張璪楊守一皆以告秦王廷美陰謀乘時遷合歷職通顯擢樞密副使與錫同掌機務踰年轉南院使賜第寶積坊時廣宮城禹錫有別業在表識內因請以易官邸上意薄之兼與宰相宋琪厚善琪爲轉請虛多遜故第上意其交過不悅琪言王廷範忠勤禹錫從旁贊之上益疑其朋比下詔切責改號衛大將軍出知滄州在任以勤政聞加涪州觀察使徙濱鎮二州駐泊部署知潞州徙永興軍州民乞留詔獎之再召爲宣徽北院使知樞密院事至道初罷爲興寧軍節度使知涇州入謝上面諭故事不

過授防禦使今特加優異委卿旌節兼之重鎮禹錫流涕哽咽
咸平中移知貝州契丹兵寇至內嚴備禦寇尋引去明年徙陝
州未幾卒年六十二贈太尉子宗慶尚主宗亮太子中允 趙
鎔初名容字化鈞涪州樂陵人少涉文史美書翰以刀筆委質
晉邸勤謹被眷卽位爲改今名補東頭供奉官爲吳越國信使
及納土又令檢校帝廩遷六宅使領羅州刺史掌翰林司轉東
上閤門使與參政郭贊有舊請託不行撫其堂吏過失以聞贊
見上白其事召鎔廷辨詞屈出知梓州兼兵馬部署在郡完城
壑嚴戰具寇至境聞有備引去遷左神武大將軍本州鈐轄徙
知廬州願留不允踰年召爲樞密都承旨同掌三班院拜宣徽
北院使同知樞密院至知院事道吏卒京城察事至誣竇書人
韓玉抵法太宗尋知其寃後廢事不聽真宗改南院使檢校太

傅以心疾求解授壽州觀察使卒年五十五贈忠正軍節度使
生平好佛多蓄古書畫三子忠輔西京左藏庫副使忠愿虞部
員外郎忠厚內殿崇班

張遷博州高唐人少孤養於叔父職方員外郎幹後隨母歸魏
仁浦自幼隸管王帳下小心謹慎卽位補左班殿直征太原還
遷文思副使至香藥庫使奏言嶺南平後諸蕃國入貢歲通關
市犀象香藥充溢府庫請於京師置榷易署聽商人入金帛市
之歲可獲錢以濟經費詔允之歲中得三十萬緡後日增羨至
五十萬雍熙二年錄其勞領鄆州刺史三年轉東上閣門使數
月卽除度支使端拱初遷鹽鐵使明年授宣徽北院使簽書樞
密院事未幾兼副使知院事與寇準不協奏事頗相矛盾準與
溫仲舒晚出朝門共轡同行有在民迎馬首呼萬歲遷令所善

街使王賓奏斥準因自辨互發其私上惡之下詔切責降遷
右領軍衛將軍俄列右金吾街仗討李順命備荆渚要害授右
統衛大將軍如江陵賜錢二百萬白金三千兩既至有峽路漕
卒數千相聚謀變將以應蜀邇捕斬首惡楊承進等二十一人
餘黨慰撫配隸州郡詔嘉之卒年五十六贈桂州觀察使子敏
中補供奉官改秩換大理寺丞至比部郎中虛中娶宗室申國
公女至供奉官閣門祇候孫先進士及第 楊守一初名守素
字象先河南人唐末避亂徙家宋鄭間稍通周易及左氏春秋
事晉邸累年質直勤謹無他材術卽位補右班殿直太平興國
中出護登州兵名還監儀鸞司遷西頭供奉官上以環衛多貴
族子弟頗衆縱命置三班院令專其事考覈授任漸有條制歲
餘改翰林司擢東上閣門使兼樞密都承旨改判四方館事雍

熙中詔護還雲朔歸附安慶兵屯于潞州三年轉內客省使
拱元年授宣徽北院使簽書樞密院事卒年六十四贈太尉節
終之禮率加常數于安期國子博士孫夢得進士及第

王延德同時有二其一開封東明人曾祖定潁陽令祖璋相州
錄事叅軍父溫遭契丹亂率鄉豪捍蔽境內里人德之宜祖掌
儀旬兵與溫厚善時延德方總角愛其謙重召置左右太宗尹
京嘗爲親校專主庖膳尤被倚信卽位授御厨副使遷正使從
征太原加尚食使賜浚儀縣壽昌坊第宅一區俄領蔚州刺史
兼武德皇城司御贖院左藏庫凡領五印懇讓始罷左藏御厨
又兼充親王諸宮使以舊恩每延訪外事延德謙慎不言端拱
初轉本州團練使後當進秩特置昭宣使以寵之與杜彥鈞同
領至道二年加平州防禦使真宗改懷州永熙陵復土提點緣

路供頓成平初出知華州俸給優厚從其請罷貽宣使幸大名
爲東京舊城都巡檢使風痺告還本郡卒年六十四贈邕州觀
察使所至撰集近事有司膳錄皇城紀事南郊錄版築記又有
永熙皇堂錄山陵提轄諸司記治郡復有下車奏報錄纂修實
錄多以訪之乃上南宮事迹三卷子應昌莊宅他端州國練使
其一大名人少給事晉邸卽位補殿前承旨遷供奉官遣與
殿前承旨白勳同使高昌國自夏州渡河經沙磧歷伊州至北
庭萬五千里雍熙二年使還撰西州程記以獻授崇儀副使轉
正使掌御厨出知慶州淳化三年代還命監折傳舍延德本以
攀附得官傾險好進與宰相張齊賢善求免監舍齊賢爲育之
上怒召詰延德諱言未嘗請宰相上疑齊賢不實齊賢亦不辨
頓首稱罪乃出延德領懿州刺史五年提點三司磨勘悉由司

未幾拜左屯衛大將軍樞密都承旨俄授度支使真宗轉左千牛衛上將軍仍充使以風痺出爲舒州團練使知鄆與青州坐市物有剩利降左武衛將軍乞骸復上將軍致仕卒年六十八兄延之乾德六年進士至屯田郎中

程德玄字禹錫鄆州榮澤人素善醫太宗尹京召置左右署押衙頗親信用事太祖大漸之夕德玄宿信陵坊夜有扣闕疾呼趣赴宮邸者德玄遽起不暇盥櫛詣晉王府方三鼓府門尚閉有項內侍王繼恩馳至稱遺詔迎太宗卽位德玄因從以入拜翰林使太平興國二年陳洪進來朝奉命迎勞渡淮暴風忽起衆請勿進荅曰吾將君命豈避險阻視而行風浪遽止三年遷東上閤門使領代州刺史征太原爲行宮使還以功改判四方館事領本州團練加防禦使坐市秦隴竹木責授閤門使尋遷

陝府西南轉運使車駕幸魏府命總御營四面巡檢掌給諸軍
資糧言者論其交遊太盛出爲崇信軍行軍司馬踰年復拜慈
州刺史移知環州時西鄙酋豪相繼內附詔付以空名告敕百
道得便宜補授淳化三年復改本州團練使知邠州討李順移
知鳳州兼領鳳成階文等州駐泊兵馬事徙慶州咸平中入朝
真宗命坐撫勞訪以邊事出知并州兼并代副都部署移鎮州
代歸卒年六十五贈鄭州防禦使兄德元同仕王府至內酒坊
副使子資祥符五年進士累遷太常博士孫繼宗東頭供奉官
閤門祇候繼忠內殿崇班

盧斌開封人初以筆札事晉邸太宗卽位補殿直雍熙中領兵
屯霸州隨曹彬北征旣克涿州令斌以萬人戍守會食盡大兵
將還斌言涿州地在北境外無援兵內無資糧終不能守彬以

爲然乃令斌擁城中老幼並狼山南還易州斌又言還師之日
遼人必乘便剽襲宜爲之備彬不能從諸將果以失律坐譴上
聞斌嘗建議詔釋不問除霸州緣邊巡檢使端拱中改永興軍
華州巡檢大賊侯和尚劉渥劫興平棧陽斌率兵襲之且追且
鬪薄南山渡渭水直抵鳳翔擒斬略盡以勞改供奉官開門祇
候賜白金緡錢衣帶尋爲梓遂十二州都巡檢使太宗諭以川
陝人情易搖許便宜從事淳化二年賊任誘等寇昌合州斌率
兵頓昌州南牛鬪山偵知賊在龍水鎮冒大雨馳四十里遂斬
誘等賊衆悉平三年又追降富順監蠻酋南羌一阿奴綱諭以
朝旨歃血爲盟而遣之俄本監及榮戎資州賊復鈔鄉邑斌擒
三百人部送闕下四年賊王盡復起斌又擊滅之遷內殿崇班
討李順率兵六百抵成都連月戰鬪殺賊數萬人明年成都不

守斌復還梓州集十州兵赴援知州張雍委以監護之任會江水溢毀子城諭州民集番鍾自城西掘大濠決水注之負土塞南北門爲固守計賊二十萬傅城下城中兵纔三千斌感厲士伍乘間突出與戰三十餘合賊稍却會王繼恩令石知顯率兵來援斌出東門迎勞賊不戰而潰乘勝追斬及納降至二萬餘賊復圍閬州斌領千兵赴之破五千人圍遂解又至蓬州老鴉山擊敗賊衆三千抵城下賊復大集斬三千殺蓬州平傳詔安撫蓬閬渠達四州擢西京作坊使領成州刺史斌在川陝六年以孤軍禦寇累立戰功旣而賊黨集梓綿漢三州境上斌復往平之代還太宗親加勞問拜東上閤門使檢校左僕射加食邑三百戶賜白金袍笏金帶上言葭萌路直通利州若寇焚棧道劔門之險不足爲固請建立砦柵從之尋轉銀夏兵馬鈐轄會

五路討李繼遷斌求對言羗人馬騎兵悍往來無定不若堅保
黨州多積芻糧敵至會兵首尾擊之庶外無枉費內不失固圍
之策不從改授靈環鈐轄領兵二萬爲先鋒斌不俟詔自環州
策馳路往與諸將失期不見賊而還徙屯寧州以疾名歸勾當
軍頭引見司卒年五十子文質殿中丞

張煦字輔陽開封人開寶末補晉府牙職太宗尹京管事左右
雍熙二年自陳命爲殿前承旨遷殿直監欽州軍凶人黃行達
弟坐法抵死誣州將故入詔煦與宣州通判姚鉉同鞫卽日決
道還捫供奉官歷鎮定邢趙都巡檢使契丹剽境上煦率所部
擊走之葛霸周瑩李繼宣咸稱其材幹詔書嘉獎代還拜供備
庫副使權知環州數月改岢嵐軍使移知保安軍討王均爲綿
漢劔門都巡檢使主攻成都東砦焚其邪及樓堞均突圍而遁

事平就遷正使徙益州都監與知州宋大初同提總本路諸軍
事有戰艦卒謀亂煦捕斬之夏人寇邊改四路都鈐轄兼安撫
都監累躡寇營掩殺甚衆詔獎之命監西路行營與王超秦翰
共援靈武至鎮戎聞城已陷乃引軍還又與張凝出白豹鎮至
柔遠川夏人邀戰會慶州監軍張綸擊殺甚衆凝按部道歸爲
敵所邀煦自慶州赴之射殺其大將景德初命副曹利用爲廣
東西路安撫使平宜州陳進改如京使知懷州東封遷文思使
知曹州權河陽鈐轄會江淮災復爲江南西路安撫都監累遷
西上閤門使徙并代鈐轄以老疾求近郡知磁州卒年七十三
煦能明術數善相宅時稱其妙

陳從信字思齊亳州永城人素以恭謹精心計事晉郎官累右
知客押衙令典王宮財用事無大小悉以諮焉開寶三年三司

言倉備月給止及明年二月請分屯諸軍盡率民船以資江淮漕運太祖大怒三司使楚昭輔懼請晉府求寬王名從信問計對曰從信嘗遊楚泗知糧運之患良由舟人糜食日歷郡縣勘給是以遲滯若計往復日期併與支給可以責其程限又楚泗運米至京復輦入倉宜宿備運卒卽時出納如此每運可減數十日舊制一歲三運若去淹留之虛日計歲可增加一運矣今三司欲籍民舟不許則無以資辦盡許之則至冬京師薪炭殆絕不若募舟之堅者任漕糧其損敗者載薪炭庶幾公私俱濟又市米所以騰貴者因官價賤買人失利不至居商亦賈而不糶故米益貴宜聽民自便卽四方奔湊者多價自賤矣明日具奏可之事果咸集太宗卽位遷東上閣門使充樞密都承旨會八作副使綦廷珪以疾在告假滿不落籍愈日不朝叅從信坐

賁授開廐使開門祇候太平興國二年改左衛將軍復爲承旨
征并汾充大同副部署因秦王事罷明年分三司爲三部投從
信度支使賈浚儀寶積坊第加右衛大將軍卒年七十三贈太
尉生平好方術有李八百者自言八百歲從信事之甚謹冀傳
其術竟無所得又成都人侯莫陳利用幼得幻術賣藥京師專
言黃白事惑人從信薦之太宗召見試其術頗驗投殿直遷崇
儀副使累遷至鄜州團練使前後賜與甚渥依附者頗獲進用
日漸橫恣居處服玩僭擬乘輿人畏之不敢言宰相趙普以聞
上遣近臣案實上猶欲庇之普固請除名配商州籍其家詔復
還之普恐其復用令殿中丞竇誼上書言利用昔監鄴州嘗南
向坐以接京使犀玉帶悉用紅黃羅袋澶州黃河清用爲詩題
試舉人判試狀言甚不遜京西巡副宋沆又進其家所獲書數

經言皆指斥乘輿上始大怒令中使伺殺之

張平青州臨朐人弱冠寓單州依刺史羅金山署馬步都虞候
太宗尹京置邸中及秦王領郡署爲親吏有潛匿府中錢物者
王白鞠之無狀因不喜遣去太宗憐其非罪以屬徐帥高繼冲
署爲鎮將卽位名補右班殿直監市秦隴木更立制度建都務
計水陸之費以春秋二時聯巨筏自渭達河歷砥柱以集于京
期歲之間良材山積上嘉其功遷供奉官監陽平都水務兼造
船塢舊因河流湍悍凡調三戶共守一舟楫役數千戶至平穿
池引水繫舟其中不復調民有寇陽拔萃者往來關輔間積年
爲患朝命內侍督數州兵討之不克平遣人以好辭說降改崇
儀副使仍領務凡九年計省官錢八十萬緡雍熙初召還同知
三班院事遷如京使連擢西上開門客省鹽鐵三使以陝西轉

運李安發其舊事憂悲成疾而卒年六十三贈右千牛衛上將軍平寬厚不念舊惡性好書史微時盡日耽玩及貴聚書數千卷嘗嘆秦王事始雖命寔後未必不爲福已而果然子從式亦事晉邸累官文思使從吉蔭補殿直轉供奉官知宜州屢破溪蠻陳堯叟上其狀遷內殿崇班開門祿候在任八年代還爲如京副使咸平中知環州嘗與宋沆率兵襲西夏小劔部署張凝表其專責授崇班俄知澧州復舊秩命副曹利用討宜州陳進斬首六十級改莊宅副使未還卒年四十九

王繼升冀州阜城人性純質謹愿自太宗居藩信任之補供奉官累遷軍器庫副使陳洪進納土以爲泉州兵馬都監會游洋洞民萬餘叛攻城繼升率精騎夜擊破之擒其魁械送闕下餘黨悉平召還遷軍器庫使領順州刺史知諸道陸路發運事雍

熙四年併水陸發運爲一司命掌其事號爲稱職遷右神武將軍端拱初領本州團練使卒年六十四贈洋州觀察使子昭遠形質魁偉色全黑人呼爲王鐵山有膂力善騎射少時遇里中祀神衆方博昭遠適至禱曰他日儻有節鉞六商皆赤一都果然遊京師與弟昭懿皆事晉邸特被親遇卽位補殿前指揮使遷都知征太原先登爲流矢所中血漬甲縷戰益急劉繼元降命守城門籍兵仗從征范陽又多所擒獲超散員指揮使領冀州刺史改馬步軍都軍頭命乘傳鎮定高陽關募兵以備契丹尋爲冀州駐泊都監授澤州團練使洺州都部署太宗屢稱其能嘗草書執扇作詩賜諸將於昭遠尤加賞遇端拱初召爲殿前都虞候領勤州防禦使二年領沙州觀察使再爲并代副都部署至道中爲靈州都部署護二十五州芻粟達靈武繼遷

不敢犯真宗徙定州行營未幾拜保靜軍節度使充天雄軍都
部署知府事咸平二年移知河陽卒年五十六贈太尉益惠和
昭遠頗知書性吝書所至無善政 昭懿至捧日都虞候昭遜
西京作坊使孫懷普九歲侍太宗左右至西京左藏庫使平州
刺史懷一供備庫副使懷正內殿承制懷英內殿崇班

尹憲晉陽人開寶中事太宗藩邸卽位擢殿直充延州保安軍
使改供奉官太平興國四年護府州屯兵與鄜州三族會攻嵐
州破敵千餘擒僞知州馬延忠拔緣河諸砦以功轉西京作坊
副使入朔州界破寧武軍殺其軍使獲人馬器甲甚衆轉供備
庫使護夏州兵殺戮三汭醜那莊岌伽羅厥葉十四族及誘其
渠帥屢降詔書褒獎雍熙初就知夏州攻破地斤澤李繼遷遁
走俘獲四百餘帳憲奏請抽移諸帳於所部別置騎兵號曰平

若以備用詔從之俄殺蘆屬及南山野狸數族遂授代還
爲洪州巡檢未幾命護莫州屯兵三年詔知瀛州兼兵馬鈐轄
領富州刺史遷東上閣門使端拱二年歷滄邢二州皆兼鈐轄
淳化初爲四方館使連護鎮定屯兵改知貝州移高陽關鈐轄
五年知定州與部署王榮不協榮毀憲什地因邑邑致疾卒年
六十三

王賓許田人小心謹愿年十餘事宣祖左右及長善騎射太祖
命署晉府右職太平興國初補東頭供奉官監亳州軍時監軍
不許挈家賓妻妬悍嘗擅至寔寔具白上太宗召其妻杖之至
死遷儀鸞副使領內酒坊從征太原范陽與劉遇攻城東西車
駕北巡佐王仁贍爲大內副部署改洛苑使會汴漕壅滯軍食
不給詔別置水陸發運兩司以賓有心計命與許昌裔同掌其

事凡四年儲積增羨號爲稱職加領濱州刺史改右神武將軍
張遜薦護黎陽軍兼領黃御兩河發運進本州團練使黎陽當
舟車交會禁兵常屯萬餘賓請建通利軍就命知軍事規起公
署郵館供帳咸具加本軍大將軍兼河北水陸轉運使貝州兵
屯無壁壘分寓邸肆賓選隙地築舍千二百區以處之優詔褒
美召入爲右羽林衛大將軍判左金吾兼六軍諸衛儀仗事淳
化四年出知揚州兼淮南發運使徙爲通許鎮都監卒年七十
七博贈加等凡事二祖一宗殆六十年最爲勤舊恩寵尤異前
後賜賚數千萬俱奉釋氏

安忠洛陽人祖叔于仕晉任方鎮以太子太師致仕父延韜左
清道率府率忠形質魁岸不知書纔通姓名而已事晉邸殆二
十年卽位授東頭供奉官弓箭庫副使西京作坊使掌翰林司

內衣庫提點醫官院護屯兵于雄州當拒馬河收後忠分砦兵
布列緣邊以備遊騎徙威武軍隸鎮定路之左廂又鑿河茸城
壁以勞擢東上閣門使與大將李繼隆川重進追契丹兵于祁
州北詔書獎飭端拱初移護高陽關屯兵契丹侵鎮定忠與崔
翰拒之傅潛陣于瀛州忠當城之西而三年徙知壽州移貝州
捕獲劇賊十二人淳化四年改左龍武軍大將軍忠泣言諸衛
將軍列在外朝不得近左右願復舊職上笑曰瓌列之尹古官
也大將軍三品汝何不知因從其請復開門使充淮南諸州兵
馬鈐轄以病歸至泗州卒年六十四錄其孫惟慶爲殿直

戴興雍丘人父延正兄進皆力田興自幼以勇力聞及長身長
七尺美髭髯眉目如畫詣晉郎求見奇之留帳下卽位補御馬
左直還直長轉御龍直副指揮使征太原先登中流矢補弓箭

直都虞候父亦授諸衛將軍進天武軍使興領嚴州刺史改天武左廂都指揮勝州團練使雍熙三年爲侍衛步軍都虞候雲州防禦使契丹擾邊命興屯澶州以備非常改本州觀察使充天雄軍副都部署端拱初遷步軍都指揮使領鎮武軍節度使賜襲衣金帶鞍馬歷澶州都部署殿前副都指揮使出帥鎮定二州時盜賊羣起五巡檢兵討之不克興陰勸所部潛出擊之擒戮殆盡未幾徙高陽關遷殿前都指揮使改節定國軍賜白金歲給錢七百萬淳化五年又改定武軍加給錢千萬西北未平徙夏州路行營都部署知州事從五路討李繼遷深入不見賊聞帝崩急赴闕哀坐擅離所部左遷領軍衛上將軍咸平初兼判左金吾街仗出知京兆府卒贈太尉遣中使護喪歸葬錄其子永和承豐

王漢忠字希傑彭城人少豪蕩有膂力形質魁岸善騎射高繼冲召不往見太宗于晉邸奇其材力留置左右卽位補殿前指揮使累遷內殿直都知征太原先登流矢中眸戰益急上壯之遷東西班指揮使太原降漢忠以所部安撫城中師還改殿前左班三遷右班都虞候領涿州刺史雍熙中改馬步軍都軍頭端拱初出爲賓州團練使歷冀貝二州部署徙天雄軍二年入爲侍衛馬軍都虞候領洮州觀察使高陽關副都部署合諸軍擊敗契丹斬馘甚衆淳化初徙定州五年遷殿前都虞候真宗自中山召歸俄復出爲高陽關都部署領威塞軍節度使咸平三年移涇原環慶兩路兼安撫使遷侍衛馬軍都指揮鎮定高陽關三路都排陣使契丹掠中山幸諸將陣于野契丹遁追斬甚衆獲其貴將加殿前副都指揮使改節保靜軍五年會罷西

面經略命爲邠寧環慶兩路都部署委以分道控制李允正宋
沆兵二萬五千人坐違詔無功責左屯衛上將軍出知襄州未
上道暴卒贈太尉錄其子內殿崇班從吉爲閤門祇候從政從
益爲左右侍禁漢忠性剛果輕財樂施有識略好讀書頗能詩
喜儒士待賓佐有禮每行師以令甚肅犯者無所寬貸故所部
無盜

張凝滄州無棣人少偶儻武力自任與鄉人角勝負約築土百
步射之凝一發洞過矢激十許步抵大樹而止觀者歎服節帥
張美壯之太宗居藩聞其名以隸親衛卽位補殿前指揮使稍
遷散祇都虞候淳化初以材幹授洛苑使領繕州刺史賜襲衣
金帶每頒賚必異等出爲天雄駐泊都監移貝州改高陽關行
營鈐轄真宗加莊宅使遷北作坊使咸平初與契丹戰挺身陷

敵子昭遠年十六單騎疾呼突入陣中挾凝以出左右披靡不
敢動明年邊兵大至凝與范廷召分據冀州東斷其歸路敵將
遁縱兵擊奪盡還所掠資口徙鎮定高陽關前陣鈴轄遷趙州
刺史四年召還爲邢寧瓌慶靈州路副部署兼安撫使時斥堠
數投運使劉綜懼飛輓不給問計於凝凝曰今當深入因敵資
糧不足慮也乃自白豹鎮率兵入敵境生擒賊將燒蕩三百餘
帳取芻糧八萬斛斬首五千餘獲牛馬器甲二萬降九百餘人
因襲破慶州蕃族胡家門等又八州原分水嶺采遺鎮熟戶與
生羌錯居頗爲誘脅凝引兵降峇都等百七十餘族合四千戶
邊境獲安就加寧州團練使景德初遷本州防禦使代楊嗣爲
定州路行營副部署徙保州駐泊兼北面安撫使時總帥王超
以大兵頓中山議擇疑與魏能田敏楊延昭分握精騎深入幽

易以牽敵勢。趙請悉隸所部。上不許。曰：朝廷本設奇兵，扼敵心腹。若復取我大將，無以責效。魏能逗撓不前，衆憤皆責讓。能疑獨無言。徐曰：能蠶材剛，復可優容之。若令心不自安，非計也。上嘉其有識。車駕幸涇州，凝率衆抵易州，爲緣邊安撫使，提兵躡契丹。後敵不敢肆，復改高陽關部。署明年，就加殿前都虞候。卒凝忠勇，自負好功，名累任西北善訓士。卒繕完器仗，前後賞賜多以犒師。京師無居第，上悼惜之，贈彰德軍節度使。中使護喪，官給葬事，厚卹其家。昭遠擢左班殿直，西上閤門副使出知定瀛雄三州。歷官至左龍武衛大將軍，卒。贈應州觀察使。

李重貴，孟州河陽人。姿狀雄偉，善射。李壽帥王審琦頗見親信，妻以甥女，補合流鎮將。謀知羣盜潛謀入劫，卽夜築柵，課民習射。盜聞潰去。太宗居藩，知其勇幹，召隸帳下。卽位，補殿前指揮。

使累遷龍衛左第四軍都指揮使領河州刺史改捧日右府營
州團練使至道二年爲麟府濁輪砦都部署賜以御劔得對便
殿因言繼遷居沙磧逐水草畜牧無定便利則進不利則走今
聞五路齊出彼必遠逃欲追則人馬乏食將守則地無堅壘臣
輩何顏以見陛下。旣而諸將果無功還改并代副都部署真宗
加本州防禦使徙高陽關行營咸平二年契丹南侵議屯兵楊
隆先鋒張凝遇敵重貴率策應兵酣戰全軍而還康保裔已覆
重貴復引兵赴援腹背受敵自申至實力戰退敵時諸將頗失
部分重貴獨以全軍還屯上功進階與食邑嘆曰大將陷沒君
曹何面目復計功耶。徙知貝州召見勞問改滄州駐泊副都部
署兼知州事連爲邢州天雄軍二部署又知冀州幸澧淵召還
爲大內都部署明年出知鄭州以疾授左武衛大將軍潘州防

梁使致仕卒

劉用相州人祖萬進河中馬步軍都指揮使父守忠左驍衛大將軍用曉音律善騎射事晉邸卽位補軍職累遷散都頭都虞候端拱初爲馬步軍副都軍頭領涼州刺史鎮定招安使轉捧日都指揮使討李順爲西路行營鈐轄賊平改刺祈州至道初爲河西烏白池都鈐轄斬首千餘級奪馬五百疋改高陽關并州副都部署真宗加本州團練使咸平中徙貝與瀛州時烽燧數驚用建議益邊兵俟契丹南牧卽率驍銳出東路以牽制其勢因圖上地形上名宰相閱視可其奏且令轉運使於保州威武靜戎順安軍預備資糧六年命將三路出師用與劉漢凝田思明領兵五千由東路會石普孫全照倚角以禦契丹未幾換鎮州景德初移邢州車駕北征以城守勞進爵邑歷知齊陳潞

三州祥符二年卒

耿全斌冀州信都人懷順軍校顯子少豐偉善左右射顯携謁
陳搏許以藩屏值顯戍西蜀全斌往省乘舟沂江大風失纜漂
七十餘里舟忽泊岸人頗異之游京師以材武自薦得名試送
隸晉邸卽位補東班承旨稍遷驍猛副兵馬從征太原還遇契
丹于蒲陰追擊至徐河因據水口要告還補日騎副兵馬使歷
雲騎軍使屯瀛州與契丹戰所乘馬連中流矢死凡三易馬戰
益力敵引去端拱初又擊敗蕃部于宥州累進殿前左班馬步
軍都軍頭在軍中多稱其能真宗嘗召問邊事口陳利害稱旨
因謂輔臣曰觀其詞氣若有志操宜試之邊郡遂拜雄州刺史
知深州徙石隰部署以備河西繼遷死率兵入伏落關誘降蕃
部數千俄知安肅軍繪山川險易爲圖以獻契丹來侵自山北

抵河澗全斌分率精銳遣子從政焚橋若擊走之改冀州刺史
高陽關鈐轄擢從政爲侍禁奇班祗候封泰山以爲濮州鈐轄
遷京卒

元達初名守曼洛州雜澤人身長八尺負膂力善射家業農不
任作苦委耒耜去之任俠縱酒常醉見道旁槐樹拔劔斬之樹
立斷達私喜曰吾聞李將軍射石飲羽今樹爲我斷豈神助耶
適以戶籍調役達當送徒闕下行數舍悉縱之郡遣追捕至達
援弓引滿追者不敢近由是亡命求見晉邸得謀帳下侍太宗
習射園亭達射連中上喜更今名卽位補御龍直隊長雍熙初
遷媯州刺史領本州團練使端拱二年擢侍衛步軍都虞候領
幽州刺史歷北面行營都部署入爲京城巡檢卒年四十二贈
昭化軍節度使達雖奮白草野歷職戎署至交士夫能折節盡

禮人以是稱之

王能定幽人初事州將袁彥名置晉邸太宗卽位補內殿直歷
殿前左右班指揮使散員都虞候領潘州刺史兼御前忠佐馬
步軍都軍頭咸平初出爲濟州團練使知靜戎軍建議決鮑河
斷長城口北注雄州塘水以限戎馬通漕以實塞下開方田盡
靜戎順安之境契丹來寇擊走之真宗語宰相詢軍校勤勇宜
力公家者委以方面能與寇能陳禹班皆有聲于時擢本
州防禦使出爲邢洛路都部署改鎮定高陽關三路行營押策
先鋒護城沂州躬率丁夫旦暮不離役所宴犒周洽手詔褒飭
徙天雄軍改定州祥符二年合鎮定兩路爲一命能領之明年
召拜侍衛步軍副都指揮使領曹州觀察使祀汾陰爲京城巡
檢兼殿前司禮成加振成軍節度使復爲鎮定副都部署兼知

定州八年入覲特令用藩臣禮賜宴長春殿舊例諸帥不得預坐因能故從有司奏併令預坐著以爲例俄還屯所改節靜江軍天禧元年轉都指揮使領保靜軍代還入見賜宴以足疾免舞韶特與醫療二年罷軍政移彭信軍近其鄉皇以寵異之卒年七十八贈太尉錄其子守信等官

魏能鄆人少應募隸雲騎軍後補日騎左射隸殿前班七遷散員左班都知太宗知其材易由是進用端拱二年加御前忠佐馬軍副都頭歷殿前左班都虞候領溪州刺史轉馬步軍都軍頭咸平三年真拜黃州刺史爲鎮定高陽關前陣鈐轄契丹入寇與諸將合戰大敗其衆斬首二萬禮統軍鐵林公奪甲馬兵械甚衆改領鄧州團練使契丹復入率州軍逆戰于南關門遣其子政與都監劉知訓問道絕設戰數十合敵退薄西山破走

之獲器甲無算又偵知將謀入鈔發兵迎擊生擒酋珍滅殆
盡六年改知威武軍士民詣闕乞留詔嘉之能建言邊境戍卒
逃逸者沒其妻子為奴婢上慮嚴迫聽緩期自新違者坐以法
徙莫州路部署與石普屯兵順安軍西營田浚河以扼寇詔楊
延昭田敏楫角為備景德初復與白守信破敵長城口賜錦袍
金帶契丹統軍撻覽攻威武順安軍能與普破其前鋒拜防禦
使轉寧邊軍部署使部精兵伺敵動止直邊人百餘掠居民樹
蕃僧為帥能與田敏楫勲合兵設伏擒之會詔能領偏師分道
牽制契丹能畏慎不而且不戢所部多俘奪人馬朝議謂不可
專任乃命蒨政敏為鈐轄明年師還大名與孫全照爭先入城
全照密疏能退縮失期及師旋不整狀責授右羽林將軍出監
鞏縣軍尋改右驍衛大將軍號州都監復康州團練使卒錄其

子正閭門祇候靖三班奉職

陳興涇州衛南人開寶中應募爲卒隸御龍右直常從太宗征河東幸幽州特被賞賜累遷天武軍指揮使端拱中改御前忠佐步軍副都軍頭王超奏隨軍遣戍汾州明年李繼隆命權知夏州尋還屯所受詔提轄河東緣邊城池器甲芻糧至道初繼隆薦其材幹召補御龍弩直都虞候咸平初爲馬軍都頭領蒙州刺史三年具授憲州刺史知霸州徙滄州副都部署移石隰駐泊會城綏州詔典與錢若水往視利害事具若水傳又徙涇原俄涇鎮戎軍部署上言鎮戎軍去涇州瓦亭砦七十餘里中有二堡請留戍兵三百從之俄與曹瑋蔡翰領兵掩擊蕃寇章埋族帳斬二百餘級生擒三百餘人奪鎧甲牛羊駝馬詔瑋嘉獎賜金帶錦袍器幣繼遷所部康如族恃險與衆尤桀黠難制

往歲鈔劫靈州芻糧興復與翰等合衆進討窮其巢穴俘老幼獲器畜甚衆盡焚掘其窖藏詔復獲之仍加賜賚景德三年遷本州團練使知徐州雖起行伍有武略所至頗著聲績軍校之中與材爲最祥符初召爲龍神衛四廂都指揮使領登州防禦使出爲邠寧環慶路副都部署兼知邠州坐擅釋劫盜罷軍職改徐州防禦使知懷州卒

王榮定州人父洪嗣仕晉爲本州十縣遊奕使榮少有膂力爲馬仁瑀廝役嘗引強射屋棟矢入數寸人目爲王硬弓太宗居藩隸左右卽位補殿前指揮使遷本班都知員僚直都虞候盜發棧州往擒之加御前忠佐馬步軍都軍頭領慈州刺史坐受秦王宴勞出爲濮州馬軍教練使復坐與秦王親吏言我不久當得節帥削藉流海島雍熙中召復前官累遷龍衛都指揮羅

州團練使率兵戍遂城擊敗邊騎擒千餘人入拜侍衛馬軍都虞候峰州觀察使出爲定州行營都部署榮所爲羸率不中理侵官地蔣蕘吝公餼不以勞將士母老不迎養供給帝怒之詔加督賁左授右驍衛大將軍真宗命領獎州刺史濱州防禦使遷涇原儀渭駐泊部署車駕北征召爲貝冀行營都部署師旋復還涇原榮疎於智略援送靈武芻糧至積石不嚴斥候夜爲藩寇所劫營部亂亡殆盡坐法恕死除名配均州起爲左衛將軍景德初權判左金吾街仗觀兵瀧淵命爲黃河南岸都巡檢二年遷左神武軍大將軍領恩州刺史郊祀改左龍武軍達州團練使祥符中遷昌州防禦使朝太清宮命爲河南駐泊都監卒年七十官其一子

楊瓊汾州西河人幼事馮繼業以材勇稱太宗召置帳下卽位

隸御龍直三遷神勇指揮使從征太原以勞補御龍直指揮使
雍熙初改弩直都虞候兼御前忠佐馬步都軍頭領顯州刺史
李順叛命爲夔峽擒賊招安使領兵自峽上與賊遇累戰抵渝
合偕尹元裴莊分路進討克資普二州及雲安軍斬首數千級
詔書嘉獎卹軍中真拜單州刺史至道初召還徙知霸州兼鈐
轄未幾改防禦使靈慶路副都部署河外都巡檢使賊累寇疆
悍禦有功又導黃河溉民田數千頃敗賊於合河鎮北獲人畜
亾算賊騎五百掠城下復擊破之追北三十里並賜詔嘉獎咸
平二年兼涇原儀渭邠寧環慶清遠靈州六路副都部署尋徙
鎮定高陽關押策先鋒屯定州明年副王超於鎮州徙定州四
年召還以鄜州觀察使充靈環十州軍副都部署兼安撫副使
敵圍清遠特選將出兵鈐轄馮守規張繼能止之命副部署潘

舜都監劉文贊率兵六千往赴逗遛不進敵攻破南門城遂陷
事聞驛召繫獄罪當死詔貸之削官流崖州繼能守規同坐籍
其家明年移道州景德初起爲右軍衛將軍分司西京累遷左
領軍衛大將軍領賀州團練使知兗州卒年六十七錄其子舜
臣爲奉職舜賓內殿崇班閤門祇候

周瑩瀛州景城人父景家富于財好交結歷事唐漢周習水利
管浚汴口導鄭州郭西水入中牟渠脩滑州河堤官至右領軍
衛上將軍太宗居潛瑩得給事左右卽位補殿直領武騎卒數
百巡警泉與福州捕劇賊千餘遷供奉官節度孫永祐轉運楊
緘皆薦之命使綏銀州按邊事還奏稱旨罷鞍轡庫副使雍熙
二年爲杭睦五州都巡檢使擒妖僧紹倫戮三百餘人時以爲
酷代還累遷監鎮定高陽關加判四方館事與郝守潛謾塞宋

州決河歷知天雄軍真定府就遷引進使至道二年詔詣李繼隆軍前授以機事還拜客省使簽書樞密院諸房公事真宗加領富州刺史封其母武功郡太夫人咸平二年從征河朔爲駕前馬步都部署三年遷南院使知樞密院事時議推瑩練達軍事拜永清軍節度使詔益兵八千分屯環慶涇原以禦繼遷景德初車駕北巡爲駕前東西具糞路都部署明年改知陝州徙永興軍移邠州西夏內屬詔省戍兵瑩復乞留詔貴其庸懦代以曹瑋徙澶州東封車駕所經特賜襲衣金帶器帛祥符初改知天平軍又爲鎮定都部署兼知定州被病卒年六十六贈侍中諡元惠瑩鮮韜略雖居禁近勲業無大過人子普崇儀副使顯內殿承制孫永昌永吉殿直

傅潛冀州衡水人少事州將張廷翰太宗召置藩邸卽位隸殿

前左班三遷東西班指揮使從征范陽先至涿州與契丹戰生擒五百餘人上嘉歎之師旋擢內殿直都虞候累遷雲州防禦使雍熙二年北征爲幽州行營前軍馬步指揮使例責右領軍衛大將軍明年起復舊官端拱初累領昭化武成二軍節度使出爲高陽關都部署真宗改領忠武軍節度咸平二年復爲鎮定高陽關三路行營都部署潛本以倖進無方略性復畏懦時契丹大入潛麾下步騎八萬皆自置鐵槌鐵槌爭欲奮擊將校以請潛不許但閉門自守契丹遂破狼山砦悉銳略寧邊軍游騎出邢洛鎮定路絕朝廷問道遣使督潛出師潛曰賊勢如此與之角適挫吾銳范廷召桑贊秦翰屢促會兵合擊皆不聽鈐韓張昭允力勸不得已分騎八千步二千付廷召等於高陽關逆擊方血戰徵援兵不至致康保裔敗死車駕將親征命石保

吉上官正白大名領前軍赴鎮定與潛會潛又逕迥不發諸將請益兵不與勝又輒抑不聞上駐大名聞之大怒遣高瑒往仁名至行在下臺獄命錢若水同按議當行法命貸死削奪官爵并家屬長流房州籍其貲產五年會赦徙汝州景德初起爲本州團練副使改左千牛衛上將軍分司西京祥符四年耶鶻西巡從還京遷左監門大將軍還其它久之判左金吾街仗卒

張昭允字仲孚衛州人以父秉隆試大理評事潘美妻以女奏換右班殿直遷通事舍人端拱初爲雄州監軍契丹掠境上與田仁朗選銳卒襲其帳敗走之進西上閣門副使提總左右藏真宗以章懷后故頗被親信授以行營馬步都鈐轄與潛同坐削長流道州景德二年起爲楚州團練副使改右神武將軍卒爲人喜筆札習騎射曉音律子正中居中

郭密貝州經城人軀幹雄偉膂力絕人幼孤隨母改適曰姓王氏馬仁踴薦隸晉王帳下卽位補指揮使復姓郭氏淳化間凡八遷移貝州駐泊兵馬部署會夏人寇邊以有武略擢領安州觀察使充靈州兵馬都部署訓練士卒號令嚴肅夏人畏服邊境寧謐卒年五十八贈保順軍節度使 傅思讓冀州信都人少無賴勇力善騎射補晉邸親事都校卽位補衛士直長累遷平州刺史破契丹兵于唐興口端拱中四遷容州觀察使知莫州移隴州所爲多不法上命殿中丞林特同判州事卒年七十 四贈保順軍節度使 李斌青州人晉邸聞其狀貌魁偉召署左右卽位補御龍直副指揮使太平興國中以天武指揮使領鄭州刺史坐受秦王饋遣貶曹州都校雍熙三年遷營州刺史四年領溪州團練使斌勤於政理人服其清慎轉運陳絳以狀

聞至道初拜桂州觀察使仍判洛州徙滄州及代吏民不忍其
去鄰境上其爭狀詔書褒美卒年六十一

弘簡錄卷一百五十九

終

弘簡錄卷一百六十

明刑部員外郎仁和弘齋邵經邦學

皇清翰林院侍講學士四世孫遠平校閱

庶官 宋六之五

張耆

孫叔夜

王繼英

蔣昭敏

王守俊等

高化

楊崇勳

夏守恩

弟守贊子隨

閻日新

劉謙

父仁罕

張孜

張昱之附

白守信

謝德權

父文節

安俊

趙振

子珣

孟元

劉謙

張綸

趙滋

范恪

馬懷德

和斌

子說

張耆先名旻字元弼開封人年十一給事真宗藩邸卽位授西頭供奉官擢供備庫副使帶御器械累以邊功遷南作坊使昭州刺史天雄軍兵馬鈐轄運徙鎮定州行營契丹侵望都耆從諸將問道往援與戰身被數創斫其臬將還言天道利先舉者

請帝大舉討之。輔臣以爲不可。會明年復入。帝悔不用其策。遷昭州團練使。命守澶州。充駕前東西面排陣使者。上邊事十餘條。多論兵貴持重。及所以取勝者。事平爲曹州趙諫所告。貶供備庫使。潞州都監久之。事稍辨。復官。管勾皇城司。帝以耆素歷河東邊事。召見宣和閣。問地里險易狀。因言雲應。蔚。朔。四郡間敵數遣人假以文移。矚虛實。識道路。宜密諭并代。自今由雲應蔚至者。從大石谷入。由朔至者。從土垠入。餘間道皆塞之。以示險。景德罷兵。與曹璨。李神祐。岑保正。閱軍籍。汰罷。滌東封。轉絳州防禦殿前都虞候。常諫。玉清昭應宮以爲殫竭財力。非所以承天意。遷相州觀察使。連徙武寧。鎮安。淮南。節度。拜同中書門下平章事。判陳與壽州。天聖三年。召爲樞密使。進兼侍中。封鄧。徐二國公。以太子太師致仕。卒。贈太師。諡榮偕。耆重。密有知數。

幼時命授以論語左氏春秋又賜宸戒二十條及聖政記冊府元龜故頗知傳記及術數之學所言象緯輒中章獻太后徽時嘗寓其家事之甚謹故臨朝寵遇最厚賜第尚書省西凡七百楹安佚富盛踰四十年家居爲曲闌積百貨其中與羣婢相貿易病者親爲診切雖藥費不令外僨所歷藩鎮頗以爲擾子二十四御之甚嚴日一見令就外舍得一守貝州坐誅誠一客省使樞密都承旨希一引進使歷知冀邢等州至均州防禦使利一補供奉官累遷西上閣門使終雄州團練使孫叔夜字稽仲初蔭蘭州錄事參軍蘭州地極邊恃河爲固每河水合輒纂嚴士不釋甲者累月叔夜以爲非計欲求要地以守有大都者介五路之間寇入寇必至彼點集然後議所向乃按其形勢延西安州自是蘭無恙患擢知襄城陳留二縣以蔣之奇薦歷知

安肅軍舒海泰三州大觀中獻文召試制誥賜進士出身遷右
司使遷還圖上山川城郭服器儀範五篇從弟克公彈蔡京京
遷怒叔夜貶監西安草場京罷召爲祕書少監擢中書舍人給
事中極陳吏惰不虔之弊先時命出門下預列使衙徐填其事
謂之空黃至是盡革之進禮部侍郎京復相以微猷閣待制再
知海州劇盜宋江起河朔轉略十郡官軍莫敢嬰其鋒至是徑
趨海瀕劫鉅舟十餘載所鹵獲叔夜募死士千人設伏近城而
出輕兵距海誘之伺兵合舉火焚舟賊還顧鹵獲皆無鬪志伏
兵乘之擒其副賊江乃降加直學士知濟南府羣盜猝至叔夜
度力不敵乃取舊赦文令郵卒傳至郡聲言赦至賊聞小懈夜
發卒乘其情擊之盜奔潰追斬數千級以功進龍圖閣直學士
知青州靖康初乞假騎兵并力斷金人歸路不報徙鄧州時四

道置師令叔夜領南道都總管金兵再至詔趣入衛卽自將中
軍子伯奮將前軍仲熊將後軍合三萬人至尉氏與金游兵遇
轉戰而前十一月晦至都欽宗御南薰門見之軍容甚整入對
請誓詣襄陽以圖幸雍帝頷之加延康殿學士陳兵玉津園鏡
甲光呀帝登城叔夜率諸將拜舞城下帝益喜進資政殿學士
令以兵入城俄拜簽書樞密院事連四日大戰斬其金瑛將
二人帝嘉其功用蠟書檄告諸道城陷叔夜被劓猶父子力戰
車駕再出郊叔夜叩馬號慟衆軍皆哭帝回首字之曰祐仲努
力金人議立異姓叔夜語孫傳曰今日之事有死而已移書金
帥請立太子以從民望金帥怒追赴軍中至則抗節如初遂驅
以北道中卽不食旣次白溝馭者曰已過界河矣叔夜變然起
仰天大呼遂不復語明日卒年六十三訃聞贈開府儀同三司

諡忠文

王繼英祥符人少孤寄育於外氏稍長從趙普給筆札普罷相從者皆散繼英趨事愈謹普再入諫名中書五房其宗在藩邸太宗選爲導吏兼內知客事名語曰汝昔事普朕所備知今奉儲宮尤宜盡節卽位擢引進使咸平初累遷左神武大將軍樞密都承旨改客省使契丹入寇密請車駕北巡上從之命馳傳詣鎮定高陽關閱視行宮備頓宣諭將士俄充瀘州鈐轄與傅潛卽軍中同名還屬吏尋掌三班院拜宣徽北院使同知樞密院事小心慎靖以勤敏稱上頗倚任之景德初拜密樞使嘗因進補單校或訴繼英蒙蔽不爲薦引上曰此輩正須因事立功方許擢用不可過求僥倖從幸澶淵還加侍進檢校太傅卒年六十一上臨哭賜白金贈太尉兼侍中諡恭懿又爲其祖父營

葬贈妻賈氏長樂郡太夫人錄子遊式遊誨遊慶遊範皆顯官
皆與門下親吏又數十人外王父諸舅有旅殞者亦詔有司給
辦

蔣昭敏字仲明祥符人父典事周世宗數戰有功入宋從平太
原終龍尉都虞候真宗爲襄王昭敏自東班殿侍遷隸府邸卽
位授西頭供奉官累遷崇儀使冀具行營兵馬都監契丹五千
騎突至冀州城南昭敏帥部兵與戰敗之得其器甲賊遁去不
失一人咸平四年領順州刺史定州行營鈐轄兼押大陣又爲
鎮定高陽關先鋒帝北巡至大名契丹退趨冀州昭敏與范廷
召追至冀州東三十里斬首萬餘級擒生口甚衆契丹委器甲
道拜唐州團練使累遷至殿前都指揮使保靜軍節度使以足
疾卒贈侍中 時宮邸攀附者又有王守俊至濟州刺史翟明

至洛州團練使王遵度至磁州團練使楊係用至西上閣門使
康州刺史鄭懷德至御前忠佐馬步軍都軍頭咏州團練使張
承易至禮賓使吳延昭至供備庫使白文舉至引進使昭州團
練使彭眷至侍衛馬軍副都指揮使武昌軍節度靳忠至侍衛
馬軍都虞候端州防禦使郝榮至安國軍節度觀察留後陳玉
至冀州刺史崔美至濟州團練使高渙美至鄭州團練使楊謙
至御前忠佐馬步軍副都軍頭河州刺史

高化字仲熙真定人少沉勇有力不事耕稼學擊劍善射契丹
犯河北化應募轉餉飛狐口留楊業戲下獲賊酋大鵬翼會又
犯真定乃辭業還家屬恐被略去化從州將入京師遂隸禁軍
遷爲襄王府牽轡官王尹京命化巡內外八廂獲姦盜甚衆遺
以金帛不受一日王趨恐名山府門馬驚墮幾殆化掖之起王

益親信之卽位擢御龍弩正雙貝都頭乾興初累遷天武右廂
蜀州團練使天聖六年夏大雨命護汴堤夜馳至城西堤壞督
守兵負土不能赴命急取城隅所積材木塞之得無患仁宗嘉
之歷擢延涇原馬步軍副都總管權知渭州發兵襲名珠族不
利左遷滑州總管改興州防禦使累拜殿前副都指揮建武軍
節度使以老辭改武安軍知相州有大獄已皆論死化凝之移
訊出其無罪三人踰年以右屯衛上將軍致仕卒年八十贈太
尉諡恭壯化謹質少過取軍有法雖起行伍頗知民事

楊崇勳字寶臣蘆州人祖守斌事太祖爲龍捷指揮使父全美
事太宗爲殿前指揮使崇勳初蔭爲東西班承旨事真宗于東
宮聞其皆學授以書令習之稍妣兵法及前代典廢之事卽位
遷右侍禁西頭供奉官寄班祇候討王均爲承受公事雷有終

使入奏，授賜錦袍、銀帶、器幣，擢內殿崇班。歷遷樞密都承旨，未幾領英州防禦使。會都知周懷政謀逆，崇勳夜與丁謂曹利用共發之。翌日懷政誅，擢崇勳內客省使，領桂州觀察，羣牧置制。使仁宗卽位，歷拜宣徽南院兼樞密副使，宮中火，爲脩葺副使。章獻與仁宗言先帝稱其質信可任大事，乃進樞密使。至上章，懿后問邀宰相張士遜過，剛亭飲酒中丞范諷劾罷。以同平章事領節河陽三城判許州。改陳州。景祐初，懷政家人訟寃，遂罷平章。連知壽與毫陳三州。契丹將榆盟，朝廷擇將備邊，復拜同平章。事判定州，以老不任事，徙成德軍。又徙鄭州，坐其子宗誨納賕枉法，以左衛上將軍致仕。卒，贈太尉，諡恭密。崇勳性貪鄙，喜中傷人，每對上輒肆言中外事，人以是畏之。

夏守恩字君殊，榆次人。父遇爲武騎軍校，與契丹戰，歿。補守恩

下班殿侍給事襄王宮遷西頭供奉官真宗卽位四遷至北作坊使普州刺史從幸涇渭數見任使歷四州都指揮秦州防禦使帝不豫章獻預政以守恩領親兵倚用之擢殿前都虞候天聖初爲永定陵總管領工徒萬數穿堊堂地土石相半事聞雷允恭伏罪守恩徙節河陽三城歸本鎮歷天雄秦寧武寧三節度使所至恃寵驕恣不法子元吉通賂遺市物多不予直通判李參發其贓除名編管連州卒 弟守贊字子美四歲而孤以兄故召入襄王宮使傅婢撫視稍長習通文字俾典東宮工作事卽位授右侍禁命往綏銀同察李繼遷幾事遷西頭供奉官寄班祇候幸大名爲駕前走馬承受時康保裔戡沒部曲畏誅揚言保裔降賊守贊受密詔往廉得其情還奏詔恤其家幸涇淵祀汾陰皆爲駕前巡檢遷綾錦副使幸亳州命脩行宮轉崇

儀使甚見親信還累遷樞密都承旨兼領三班院每契丹使至與楊崇勳迭爲館伴凡十餘年擢侍衛親軍殿前馬步軍都虞候歷五軍節度使定州路都總管寶元二年召知樞密院事帝問西事守贊育願併小障兵以據衝要伺便邀擊功或可成帝然之辨明劉平石元孫之枉自請將兵擊賊換宜徵南院使兼經略安撫緣邊招討使命以御劔隨之然性實庸怯寡方略不爲士卒所服尋詔駐軍河中居數月徙屯鄜州康定元年召同知樞密院事以子隨卒請罷以天平軍節度進判瀘相瀛三州卒贈太尉諡忠信 隨字君正慎重少過頗好儒多與士大夫游初蔭殿侍仁宗在東宮爲奉府副率卽位除內殿承制歷闕門使出爲天雄兵馬鈐轄歷泰州防禦使元昊反爲鄜延路副都總管獲其僞書投錦袍銀帶境上以問金明李士彬隨力辨

其亾他士彬感激擊賊自效轉耀州觀察使知亳州劉平敗徙知河中以父爲經略留充會靈觀使守其遺遷任陝西綠邊招討副使卒贈昭信軍節度使諡莊恪

開日新宿州臨渙人少爲本州牙職補三司役史淳化中選隸壽王府主郎中記簿卽信擢供奉官提點雄霸靜戎軍權場咸平中歷遷供備庫副使虜州都監景德初管勾邠寧環州駐泊兵馬從部署張凝屢入邊界焚羗人族帳連知涇與慶州上言野溪三門等族恃險隘築點難制請開古川道東至樂業鎮西山府城從之就轉供備庫使知環州兼邠寧環慶路鈐轄綠邊都巡檢使二年遷如京使領萬州刺史朝陵東封皆爲行宮使祥符初改文思使口新本起側微好作爲以圖進取自陳筋力尚壯願守邊城效用遂真拜防州刺史知渭州兼涇原路駐泊

鈐轄將祀汾陰改知同州車駕至迎謁獻方物勞問久之賜襲衣金帶還又設絳樓樂伎以迎駕明年徙知徐州代還擢右領軍衛大將軍昭州團練使知單州以疾卒年六十八嘗言羣臣子弟蔭官者往往未童卽受俸望自今年二十以上始給又京城百官早朝而學士丞部舍人以上導從太盛望令裁減其建白多類此

劉謙博州堂邑人曾祖直以純厚聞里中有盜其衣者知而不問州將義之賜以帛不受父仁罕輕俠自任五代末寇盜充斥率衆斷澶州浮橋誘獲賊徒出芻粟給官軍補內黃鎮將嘗至酒家遇羣寇暴集以計悉梟其首詣留守向拱拱壯之補汜水鎮將俄爲散都頭宋初遷龍衛都指揮使征廣南爲前鋒還改同州都校卒謙少慷慨不拘小節亡命京師應募從軍補衛士

稍遷內殿直都知真宗升儲增補宮衛太宗御便坐親選諸校授西頭供奉官東宮親衛都知賜袍笏靴帶器幣卽位授洛苑使謙本起行伍不樂禁職改殿前左班指揮使咸平初累遷殿前都虞候景德初歷殿前副都指揮振武軍節度使上言邊城早寒常例八月給屯兵冬衣請於六月預給著爲例上東封詔謙都穩山下馬步諸軍與左藏庫副趙守倫閱視山門著籍者乃得上禮成進都指揮使移保靜軍節度使卒年六十贈侍中子懷懿東染院副使懷詮內殿崇班閣門祇候

張孜初名茂實以諱改今名母爲悼獻太子乳母孜方襁褓真宗以付內侍張景宗令謹視之養以爲子蔭補三班奉職給事春坊司轉殿直遷供奉官閣門祇候爲陳州兵馬都監築堤袁家山捍水陳以無患五遷至供備庫使恩州團練使真定路兵

馬鈐轄歷知莫貝瀛三州爲人安重習事運使張盪之奏罷冀
貝驍捷軍士上關銀鞵錢又能保州雲翼別給錢孜皆力止之
不聽軍果怨叛尋副富弼使契丹以勞累遷并代副都總管河
東更鐵錢人情疑貳部兵相率扣府門閉不納幾爲亂孜策馬
從數騎往諭之皆散還營遷濟州防禦使侍衛馬軍都虞候轉
殿前司加桂州觀察使虎翼兵十餘人乘夜大譟欲爲變孜擒
首惡斬之然後聞遷昭信軍節度觀察留後侍衛馬步軍副都
指揮使中丞韓絳論孜自幼長於禁中頗涉疑似請罷兵柄出
爲寧遠軍節度使知潞州徙陳州仁宗復召孜絳疑富弼引之
奏請黜弼弼引咎求罷然進擬實不自弼絳坐譴蔡州孜尋亦
出知曹州卒贈太尉諡勤惠 張盪之字景山秘之子及第補
樂滑尉累遷集賢校理通判常州知溫州蔡齊薦其材擢提點

河南刑獄知亳州楊宗勳恃恩不法誣蒙城知縣王甲盥之寢
得寃狀出之配姦吏若干人徙廣南東路轉運使夸人有犯舊
多慘酷盥之請以漢法從事權度支判官改京西轉運加直史
律徒河北時諸州發卒斬西山木多致竄匪盥之戒以毋得深
入自是緣邊士卒率不敢逃還爲戶部鹽鐵副使擢天章閣侍
制河北都轉運兼按察使所在保州廣信安瀟軍自五代以來
別領兵萬人號策先鋒太祖嘗用之有功每出援隣道別賜優
給其後不復出主者坐廢糜賜通判石待舉請罷之內侍楊慎
敏不悅巡檢司雲翼卒遂殺待舉閉城作亂盥之自魏馳至城
下召諸將田况等攻城殺降卒數百坐奪職知魏州又坐冀州
人段得政謀囑事下御史按劾奪三官監鄂州稅起知漢陽軍
俄還刑部郎中復待制歷湖楊二州以光祿卿致仕卒

自守信開封人祖延遇仕周至鎮國軍節度使父延訓宋初爲
龍捷都指揮使領博州刺史守信蔭補東班承旨遷右班殿直
以善射長供奉官帝御器械三遷至供備庫使咸平三年契丹
犯邊與王能成邢州俄又與麥守恩石贊領先鋒禦之敵退復
與荆嗣督河北京東捕賊四年命爲鎮州行營鈐轄領騎兵屬
大陣西偏屢當格鬪改定州鈐轄復徙鎮州王繼忠陷師還渡
河敵人乘之守信據橋控矢每發必中敵不敢近真宗與輔臣
議三路禦敵皆言威鹵扼北道要害尤甚守信久練邊計知戎
務乃命爲鈐轄戍順安景德初契丹侵長城口與魏能發兵破
之追北過陽山斬獲甚衆賜錦袍金帶又徙屯冀州轉運劉綜
舉守信智勇材幹堪任將帥加領康州刺史提騎卒戍靜戎軍
兼涖營田之役俄爲鎮定鈐轄敗契丹前鋒獲輜重又入敵境

俘擒甚衆及契丹請和守信與曹瑛特留任追叙前勞加合州團練使祥符三年副李廸使契丹再遷南作坊使卒甚悼惜守信居邊久名聞北庭喪還常賜外別資錢五十萬錄子以官謝德權字士衡福州人父文節仕王氏爲侯官令入南唐爲饒州團練使以驍勇聞世宗南征節擐甲渡江潛覘敵壘吳入號爲鐵龍後守鄂州拒宋師戰沒德權以父死事畧莊宅副使歸宋補殿前承旨遷殿直陝西巡檢以勞就改右侍禁咸陽浮橋堞運使宋大初命德權覘畫乃築土實岸聚石爲倉用鐵牛制之由是無患咸平二年宜州蠻叛陳堯叟命單騎入境諭以朝旨衆咸聽命加閣門祇候爲廣韶英雄連賀六州都巡檢使代還提點京城倉草場受命廣京城衢巷其規制廣袤及禁鼓昏曉之制皆所條上上悉從之有凶人劉擘僧澄雅誣訟執政與

許州民陰構西夏爲叛詔德權監溫仲舒謝泌鞠問具奏其安
時無濫獄帝將幸澶淵命城新樂縣遷供奉官又命浚北平砦
濠葺蒲陰城奏言邊兵屯聚一處非便願速分戍鎮定高陽三
路天雄城壘濶遠請急葺之其北宜亟治德清軍城以爲豫備
臣實慮蒲陰工作未訖寇必暴至旣而契丹果圍城德權單馬
間道赴行在遷內殿崇班提轄三班衙司爲設條制均其差使
有規免重役假名內侍主藏咸奏罷之上稱其有守命提總京
城四排岸領護汴河兼督雜運先時主者因循但挑沙攤岸陟
遇河流汎濫卽復填淤德權務令盡去浮沙至土爲限棄沙隄
外遣三班使分主其役爲大錐以試凡引錐可入者卽坐所轄
官吏多被譴免仍植柳數十萬以固堤岸又建議廢京師鑄錢
監徙西窰務于河陰大省勞費改崇儀副使兼領東西八作司

凡役皆尅日而就東封命計度發運遷供備庫使預脩玉清宮
劉承珪勞役過甚日與忿爭不能奪遂求罷復領京城倉草場
導金水河自皇城西環太廟凡十餘里祥符三年出知泗州改
西染院使卒年五十八錄其子平爲定遠主簿德權清苦勤幹
好興功利多所經畫見官吏徇私者必面斥故所至肅然然喜
采察纖微朝論惡之

安俊字智用其先太原人祖贊高州團練使仁宗開資善堂俊
以將家子謹厚選爲祇候卽位補右班殿直累遷環州都監破
元昊吃虹井那諸砦韓琦上其功遷內殿崇班環慶路都監徙
涇原與狄青范恪同名使備北邊擢內園副使會葛懷敏敗命
爲秦鳳路鈐轄復徙涇原因條上禦戎十三事改原與麟州遷

六宅使貴州刺史知忻代二州爲帥臣誣奏降京東路鈐轄知

青州富弼爲辨理真除虢州刺史徙知滄溼冀三州秦州築古
渭城徙秦鳳路總管歷侍衛步軍都虞候陵州防禦使卒贈閩
州觀察使俊在邊久故羌人識之种世衡嘗問降俘若屬於吾
將誰畏曰畏安太保指箋於坐曰此長鞬將軍是也

趙振字仲威雄州人景德中從石普于順安軍獲契丹陣圖授
三班借職監押隰州兵馬捕盜青灰山殺獲甚衆高平蠻叛徙
湖北都巡檢兼制置南路振以南方暑濕弓弩不利別創小矢
激三百步中輒洞穿蠻遂駭散歲中遷慶州沿邊都巡檢使時
金湯李欽白豹神木馬兒高羅跛臧三族尤悍難制振募降羌
以利害相攻破十餘堡欽等自詣來歸振爲置酒取細仗植
百步外共射振十矢皆貫欽等驚誓不敢犯明年涇原屬羌胡
薩逋哥等叛鈴轄王懷信以兵屬振屢捷常從數十騎遇賊十

倍射殪數十餘悉退散未幾賊數萬圍平遠砦都監趙士龍戰沒振出別道力戰抵砦奪取水泉率敢死士破圍賊走追斬數千級徙涇原都監歷知順安保安廣信軍改京東都大提舉捉賊知環州加領象州防禦使元昊將反爲金銀冠佩飾甲騎遺屬羗振潛以金帛誘取之以破其勢時東交金明萬劉諸族勝兵數萬悉爲賊有及劉平等敗惟環慶無患擢龍神衛四廂都指揮使鄜延路副都總管知延州尋改捧日天武四廂語將吏曰賊必乘勢以進勢宜固守賊果寇塞門砦振坐擁兵不救貶太子左清道率府率潭州安置踰年復右武衛將軍惠州團練使并代路兵馬鈐轄就遷副總管元昊旣破豐州將襲近砦振率鈐轄張亢麥允言出麟州深柘堰擊破之兼領嵐憲六州軍事河外饑設法通砦外商得米數十萬斛軍民以濟進博州防

禦使改解州終左神武軍大將軍振剛強自負有武力便弓馬
喜謀畫輕財尚義聚樂爲用子珣瑜璞皆工騎射知名珣年
十六仁宗名試便殿除三班借職復閱武藝授殿直令呂夷簡
試以策略條對數千言進閣門祇候爲濠州兵馬都監隨父西
邊訪得五路徼外形勝利害作聚米圖經五卷并上五陣團兵
事十餘篇帝給步騎使按陣旣成臨觀之陝西招討陳執於薦
爲緣邊巡檢使擢通事舍人監涇原路兼治籠竿城授兵萬人
御賜鎧仗令自擇偏裨參佐近城麻堽黨留百餘帳爲暴珣引
兵二萬自靜邊歷揆吳祗木寧襲賊俘獲數千計靜邊將劉滄
殿後爲賊所掩復從騎數百拔山之暗璵居龜谷無所屬珣以
書招之遣以綵錦遂聽命聞元昊大入徙軍新壕外議欲掩襲
時葛懷敏屯五谷口珣語曰敵遠來鋒銳莫若依馬欄城布柵

以扼其歸路守鎮戎城以便餉道俟其衰擊之此必勝之道不聽兵遂通鎮戎城越界壕抵定川未及陣夏人引鐵騎來犯珣居陣西北與珣戰甚力東壁兵輒潰中軍大擾珣揮刀斧手前鬪夏衆稍却我軍復陣懷敏詰朝退就食鎮戎俄夏騎四合珣被擒瑜以身免人多惜之後卒贈莫州刺史

孟元字善長涪州人性謹愿少孤頗喜讀書與劉謙俱隸禁軍元以挽彊悉補殿侍退散都頭指揮至如京使并代兵馬鈐轄徙高陽真定等路討王則赴城下被數十創中機石墜濠中既出戰愈力募死士山永濟渠穴地以進賊平改右驛驛使徙大名府路鈐轄河朔饑權知滄州民倚鹽活歲荒不售元度軍食有餘悉用易之得不轉徙中丞郭勸薦擢普州刺史遷宮苑使專管勾麟府軍馬事謾築永寧堡敵不敢動歷遷并代大名府

路副都總管徙定州郝延路卒贈遂州觀察使 劉謙字漢宗

開封人由衛士至捧日右廂都指揮使領嘉州團練使兼京城
巡檢討元昊改博州團練聚慶路馬步軍總管兼知邠州生平
不讀書區處鬪訟曲直皆常理前守者強市民物以飾厨傳謙
至獨無所撓邠人頗愛之夏竦奏爲涇原路總管徙知涇州夏
人寇鎮成軍謙引兵深入破其聚落以功遷龍神衛四廂都指
揮終象州防禦使贈永興軍節度觀察留後

張綸字公信潁州汝陰人少倜儻任氣補三班奉職遷右班殿
直從討王均諭降寇數百不殺以功遷右侍禁慶州兵馬監押
擢閤門祇候益彰簡等州都巡檢使部卒縱酒掠居民綸斬其
首惡數人徙荊州提點刑獄遷東頭供奉官提點開封府界縣
鎮公事使靈夏還擢知辰州會溪峒彭氏蠻內寇綸築蓬山驛

賊路不通。道去徙知渭州。改內殿崇班知鎮戎軍。繼復入寇。再
爲辰澧鼎等州緣邊五溪十峒巡檢安撫使。諭發曾禍福。悉所
掠民遺官與盟。刻石示信。久之拜江淮制置發運副使。奏除通
秦楚三州鹽戶宿逋。官助器用。鹽入優與之。直歲增課數十萬。
復于杭秀海三州置鹽場。歲入課百五十萬。居二歲。增上供米
八十萬。疏五渠。導大湖入于海。復租米六十萬。開長蘆西河。以
避覆舟之患。又築漕河堤二百里于高郵北。旁銅鉅石爲十礎。
以泄橫流。秦州有捍海堰。延袤百五十里。久廢不治。歲患海游
冒民田。繪議脩復。論者難之。表三請。願身自臨役。遂命兼知秦
州。堰旣成。州民利之。爲立生祠。居淮南六年。遷文思使。昭州刺
史。爲契丹陸緒弔慰。副使。歷知秦瀛滄州。再遷東上閣門使。真
拜乾州刺史。徙知潁州。卒。繪有材略。所至興利除害。性復寬恕。

喜施于每見漕卒凍餒道死輒推俸錢市絮襦千數衣之

趙滋字子深開封人父士隆天聖中爲閩門祇候邠寧環慶路都監戰沒錄滋三班奉職少果放任氣有智略康定初以右侍禁選捕京西叛卒有功累除涇原儀渭鎮戎軍都巡檢會渭州得勝砦主姚貴殺監押崔絢劫宜武神騎卒千餘人反攻羊牧隆城滋馳至諭降八百餘人貴窮出走招討使令滋給賜降卒遷補將吏滋曰如是是誘其爲亂也藏牒不奉命使怒故賞弗行范仲淹經略陝西舉其可用授閩門祇候爲鎮戎軍西路都巡檢令提舉捕捉京西賊張游數月平之安撫富弼再舉爲京東路都巡檢登州乳山砦叛兵殺巡檢滋承檄驗治馳入其壘次第推問誅首惡數人得黨與百餘付獄衆莫敢動以獲盜功趙授供備庫副使定州路駐泊都監韓琦以爲真將卽村命權

并代路鈐轄改管勾河東經略司公事建言代州寧化軍地皆肥美募人田作教戰射爲堡砦民獲其利遷西上閭門副使知安肅軍徙保州滋強力精悍有吏能所在稱治時契丹遠約令民乘小舟漁界河中吏懼生事莫敢禁又遣大舟十餘自海口運鹽朝廷以滋可任徙知雄州至卽繕治城壁樓櫓戒巡兵捕殺其人葺其舟漁者遂絕在雄六年契丹憚之值歲大饑簿書米鹽皆有條法出入無禁邊人德之加領嘉州團練使累遷四廂俱都指揮使英宗卽位轉端州防禦使步軍都虞候賜白金留再任卒贈遂州觀察使滋性廉謹月得公使錢不以入家取軍嚴肅戰卒服役如廂兵莫敢有言然傲慢自譽此其短也范恪字許國開封人初名全少隸軍籍馳勇善射臨難敢前趨入捧日軍爲殿前指揮使數有戰功康定元年試武伎擢內殿

崇班慶州北路巡檢使預攻破白豹城既還夏騎追襲恪設伏崖險伺敵半度邀擊之斬首四百生獲七十餘人以功遷內殿承制管會諸道兵攻十二盤中流矢督戰愈力親礮石中有火爨者取以令衆曰賊矢石盡川匱下墜矣士卒聞之爭奮遷徙備庫副使所用弓勝一石七斗其箭鏃如鏢名曰鏢弓羽間輒識官名姓氏每發必中至一箭貫二人他日取蕪蒿若歸般後爲數千騎所襲恪視矢箠止有二矢卽爲引滿之勢賊遠卻嘗與總管杜惟序鈐轄高繼隆將兵分討漢乞薛馬都鬼等三特恪先破都鬼而繼隆圍薛馬不能下馳往取之既又援惟序下漢乞砦改左驍騎副使敵犯大順城諸將閉城自守恪獨率兵千餘戰克之改宮苑副使環慶路兵馬都監仁宗召見適有邊奏賊犯劉瑋堡令乘傳亟往遷禮賓使榮州刺史環慶路鈐轄

手詔趣范仲淹起兵赴援恪晝夜兼行比至平涼賊已解遷洛苑使權秦鳳路兵馬總管累遷至保信軍節度觀察留後以疾出爲永興軍路副都總管卒贈昭化軍節度使

馬懷德字得之祥符人父玉東頭供奉官自言懷德可試引弓擊劔角觚補三班奉職爲延州南安砦主東路巡檢數以少擊西賊敗其衆范仲淹脩青澗城奏爲兵馬監押以所部兵入賊境破遮鹿要關二砦親射殺其酋狗兒廂主遷左班殿直又率番漢燒蕩游澗茶山龍柏安化十七砦三百餘帳斬首數百級尙馬駝牛羊萬數遷右侍禁韓琦薦授閤門祇候廂籍又奏爲東路都巡檢使有夸黑神厥保等十八砦犯邊趨僕射谷懷德先於谷旁引兵數千據高原待之斬首二百級得畜產器械千數遷內殿崇班又以兵脩龍安城敵不敢犯改邠延路都監城

綬平破賊青化押班吃當三砦殺獲甚衆復與國子博士高良
大會西人盡界籍具論前後功遷供備副使兼閣門通事舍人
時川兵久民多亡散懷德獨招輯有方經略梁迥奏請推其法
諸路歷知保安軍環州環慶益利路鈐轄累遷至殿前都虞候
步軍副指揮使隨州觀察使英宗遷靜難軍節度觀察留後卒
贈安遠軍節度管中流矢鏃入於骨以弩弦繫鏃發機出之
和斌字勝之濮州鄆城人選隸散直爲順德軍指揮使數扞敵
被重創十餘知軍事劉兼濟以兄平敗執送京師并遣其家斌
密寓金帛他所慰安調護終始賴之定川之役輟所乘騎與將
曹僕且戰且行得俱免狄青南征使將騎兵爲前鋒說曰兵疲
於險利在速戰遂有歸仁驛之捷師還仁宗問破賊形曲加拊
勞擢文思副使權廣西鈐轄留累歲徙涇原神宗名對盛言交

州有告無益願戒邊臣無妄動進帶御器械涇部餽帥王廣淵
命斌賑給擇地營居養視有法所活萬數南安入寇復徙廣西
累遷皇城使昭州刺史擢水蠻羅世念犯宜州斌提步騎三千
進討因示弱驕之蠻果大入誘至平坂列八陣以待張疑兵左
右山上分精騎翼其旁蠻登嶺望見大驚斌自被甲步出殊
死戰遂大收率其會黨四千八百內附遷領榮州團練使知宜
州進西上閤門使知邕州以老請還除高陽關副總管歷步軍
都虞候卒年八十贈寧州防禦使斌老於爲將以恩信得邊人
心嶺南珍貨一無所畜邊吏欲希功造事皆憚不敢發或巧爲
謀幸子必折其姦謀故所至無事人多稱之子說以蔭爲河
北副將累官右武大夫威州刺史知雄州上制勝強遠弓式能
破堅三百步外號爲鳳凰弓進相州觀察使在鎮十年頗能偵

弘簡錄卷一百六十
敵送典取燕之謀童貫名計事悅之奏爲副統分麾下兵從種
師道軍于白溝旬有二日見契丹尚強遽變前說貫勃洗覘候
不實貶濠州團練使筠州安置平燕肆赦獨不得還後復官卒